

萬有文庫

第二集七百種

王雲五主編

企鵝島

(一)

佛郎士著
黎烈文譯

商務印書館發行

誠意伯文集

(三)

劉基撰

何鏜編校

國學基本叢書

誠齋伯文集卷之七

跋

書蘇伯愔御史斷獄記後

往歲朝廷慮天下斷獄之未審。用中書御史臺議。遣官審覆論報。僕時居山間。聞人言之。山嶽震疊。如雷。雨之將至。陰風鳴條。飛電爍目。豪民猾吏。竄伏如鼠。俱自期不能免。而銜冤抱痛之民。莫不伸眉引項。若稿葉之待滋潤。及其至。則風止雨霽。望者如敗軍之歸。而畏者如鷹隼之脫條。而得扶搖也。則恠而問於老成更事之人。咸曰。斷大獄必視成案。苟無其隙。不得而更焉。因退自太息曰。苟如是。烏用是審覆者爲哉。於是大信刀筆之真能生死人矣。旣又聞諸人曰。非朝廷意也。奉命者之不恪耳。及觀國子博士黃先生所敘御史蘇公慮囚湖北所平反事。曷嘗拘於成案哉。然後知賢人所爲。固與衆人異矣。夫以一湖北之地。公一巡歷而所平反者八事。所擿豪右之持吏而尼法者。又數事。豈他道之無冤民耶。無蘇公而已矣。僕往嘗觀于牧民之以簡訟名者之其庭。草生于階。視其几。塵積于牘。徐而訪于其鄉。察其田里之間。則彊梁橫行。怨聲盈路。問其故曰。官不受詞。無所訴受之而已矣。大吏至則曰。官能不生事。民譁。非官罪也。則皆扶出之。訴者悉含話去。則轉以相告。無復來者。由是卒獲簡訟之名。嗚呼。輿圖廣矣。不皆得蘇公。

彼上報于朝廷者。又將獲備事之賞矣。然後怨憤之氣。拘而爲鬪殺。激而爲盜賊。鬱而爲災沴。上應乎天。誰之咎哉。嗚呼。使人人如蘇公。刑期于無刑。不難矣。明天子在上。庶其見之。則求諸老成。以爲典刑。舍是編其奚適哉。

書劉禹疇行孝傳後

世之所謂浮屠者。果何道而能使人信奉之若是哉。人情莫不好安樂而惡憂患。故惴之必於其所恒懼。誘之必於其所恒願。然後不待驅而自赴。浮屠氏設爲禍福之說。其亦巧於致人與。夫四海之衆。林林也。而無不爲其所致。何哉。彼固非止惑愚昧而已也。人情無不愛其親。親沒矣。哀痛之情未置。而謂冥冥之中。欲加以罪。孰不惕然而動於其心哉。間有疑焉。則羣咻之。若目見其死者拘於圜。受箠楚而望救者。故中材之人。莫不波馳而蟻附。雖有篤行守道之親。則亦文致其罪。以告哀于土偶木俑之前。彼固自以爲孝。而不知其爲大不孝。豈不哀哉。且彼謂戕物者。必償其死。故有牛馬羊豕蛇虺之獄。謂天下之蠢動者。舉不可殺也。今夫虎豹鷹鷂。搏擊蜚走。以食。日不知其幾何。而獨無罪也哉。人之殺物有獄矣。虎豹食人而無獄。何其重禽獸而輕人也。彼又謂婦人之育子者。必有大罪。故兒女子尤篤信其說。以致恩于其母。吾不知司是獄者。誰歟。人必有母。將舍其母而獄人之母與。將并與其母而獄之與。獄其母不孝。舍其母而獄人之母。不公。不孝不公。俱不可以令。二者必一居焉。將見羣起而攻之矣。雖有獄。誰與治之。宰天地者帝也。彼則謂有佛焉。至論佛之所爲。响响嫗嫗。若老婦然。有呼而求救。不論是非。雖窮凶極惡。無不引手援之。使有罪者勿恒刑。是以情破法也。夫法出於帝。而佛破之。是自獲罪于天也。吾知其無是事也。

昭昭矣。以劉子之賢。其不爲所惑。無足恠者。吾獨悲夫天下之爲劉子者。不多也。故又爲之言。以寤夫知愛其親而不知道者。

書善最堂卷後

武林陳舜中以善最名其堂。介其友富君子明求予言。夫立言以明道。而求言于人者。將以正己之所學。言可以苟乎哉。所謂善最者。蓋本於東漢東平王王之言。天下之格言也。人以是而服膺焉。聖賢之爲道。不外是矣。然善之云。不過槩而言之。求諸實踐。必有其方。不可徒云云而已也。今夫世俗之人。類以善自名也。觀其行而不掩。道之不明也久矣。夫善未易擇也。恭與諂相鄰。訐與直相似。小諒賊信。小慧賊智。小剛賊勇。小不忍賊仁。故有非禮之禮。非義之義。疑似之間。禽跖分焉。可不慎哉。是故擇焉而不得其中。道焉而不知其窮。古之人有爲之者。楊墨是也。知焉而不能蹈。好焉而不能取。其名不必其實。古之人有爲之者。郭公是也。若人之心。未嘗不自謂己能善也。而卒於不善。爲善之名。豈易當哉。且題扁之設。起於何人乎。盤之銘。几杖之書。朝夕警省。淬厲以成其德。非銜外以爲觀也。今之揭于軒。標于楣。大書以示於人者。其果有志于自警乎。抑將從事於詠歌以爲娛也。屈子曰。善不由外來。名不可以虛作也。古之人有衛武公者。抑抑之戒。陳于庭。而睿聖之名垂于後。若是故詠歌乃有益也。嗚呼。詩不如抑。人不如衛武公。則求者爲徒求。言者爲妄言矣。

題醫者王養蒙詩卷後

李君一初序王養蒙之爲醫。且美其不屑爲吏。予獨謂此無足恠者。虎豹鷹鷂。日殺物以養其軀。至死不

厭。騶虞視生草而不折。見生蟲而不踐。其嗜好不同。出於天性。易之則兩死。物理然也。何獨疑於人哉。故吏與醫爲二道。活人以爲功者。醫之道也。其心慈以恕。而仁者好之。利己而無恤乎人者。吏之道也。其心忍以刻。而不仁者好之。故以吏之心爲醫者。業必喪。以醫之心爲吏者。身必窮。又何惟乎善醫者之不屑爲吏也哉。雖然。今之以醫道爲吏者。未見也。而以吏道爲醫。則有矣。然則養蒙賢乎哉。吾故發李君之言。以附于孟氏論巫匠之末。

書爲善堂卷後

大梁武子實之父明德君。名其居之堂曰爲善。君卒。子宣奉其母夫人之命。祠君子堂。而服膺爲善之訓。乃作法海蘭若于建業城南。又奉母航海至于補陀洛伽之山。以求所謂大士真儀者。將以廣爲善之路也。故翰林學士虞公爲之記。文獻之士爲之言者不少。而子宣之求言於四方未已也。吾固有以知其心矣。夫人志于道而未獲所向。故願就有道而正焉。是其好學篤行之誠。積于中。而見乎外也。正宜因其憤悱而啓發之。情無有以聖人之道與之言。而徒就其所已行者。縷縷焉。宜其不足乎心。而求之不置也。孟子曰。不直則道不見。我且直之。昔宋人有好玉者。得燕石焉。以爲玉而寶之。革櫃十重。巾十襲。周客見而笑之。夫好玉則誠好玉矣。而未爲知玉也。故不免爲識者所笑。堯舜禹湯文武周公之道。載在方冊。其所言皆善言也。其所行皆善行也。天下之善莫能外之矣。舍是而他求焉。惑也。夫人之所食以生者。五穀也。今有厭五穀而不食。則必求夫爽口蜚吻之味而食之。則不戕其生者。鮮矣。故聖人之道。五穀也。異端之道。爽口蜚吻之味也。聖人之道。求諸日用之常。異端之道。必索隱以行恠。其勢不並立也。是故欲求道者。

必先定其所向。如將適燕。先舉轅而指北。然後訪而取途。則無倒行之悔矣。故孟子道性善。必稱堯舜。恐其不知孰爲善。孰爲不善也。故以堯舜的之知所在矣。又必有至之之道。是故顏淵問克己復禮。必請其目。如是而後可以言爲善矣。擇之而不得其正。爲之而不知其方。心與事相違。而德與言不相類。冥行而不問。學者之失也。問焉而不告。聽者之咎也。人有所請。不知則不必言。知則當盡言之。不然。則皆聖人之罪人矣。予雖不識子宜。觀其求之廣。而知其志之篤。於是乎盡言之。

書紹興府達魯花赤九十子陽德政詩後

會稽方外僧詩若干首。美監郡子陽公也。至正十四年。予自台之越。居城之南陬。近寶林教寺。寺主者別峯師。有文行。且喜接賢士。由是得相從以遊。其年秋七月。用章師又自浙西來。住能仁禪寺。二上人皆以文章馳名。而其屬寺之主者。亦多能爲詩。乃九月遇于寶林。因語及郡太守子陽公之政。交口贊美。至有感泣者。上人乃分韻俾爲歌詩。以頌公德。而屬予爲敘其意。予聞國風雅頌。詩之體也。而美刺風戒。則爲作詩者之意。故怨而爲碩鼠。北風。思而爲黍苗。甘棠。美而爲淇澳。緇衣。油油然感生于中。而形爲言。其諛也不可禁。其歌也不待勸。故嚶嚶之音生于春。而惻惻之音生于秋。政之感人。猶氣之感物也。是故先王陳列國之詩。以驗風俗。察治忽。公卿大夫之耳可贖。而匹夫匹婦之口不可杜。天下之公論。於是乎在。吁。可畏哉。予以今年春始來越。是時浙東六郡。皆警于盜。惟越爲無事。故士大夫之避地者。多在越。或有謂予曰。越之從政者鄙。又左右皆兇人。恐不能和其民。萬一變生肘腋。子將安之。予方謀適他所。忽有言者曰。子陽公且來歸。公住在婺女。有惠愛孚于民。予舊嘗聞之。則大喜。默爲越人慶。而又自慶其得賢地主。

以爲依而安處也。至于今果諧所願望。得不深可喜耶。於是乎序。而以其詩附于淇奧緇衣之後焉。

題劉商觀奕圖

右昔人臨唐劉商觀奕圖。其曰。李伯時臨。茅君彥勒。蘇先生識。蓋皆假設之云。而其描寫模刻。實俱妙絕。不必問其真作於何人也。王生以采薪入山。父母妻子待之以食。見奕者而耽觀之。至于爛其斧柯。豈所謂力本者哉。比歸而親戚鄉黨咸非其舊。可悼也已。一夫一婦。不獲自盡。伊尹恥之。以戲迷愚人。使之老無所依。其果有是事耶。神仙亦未仁矣。

書申屠子迪毀柸木廟曹操像文後

柸木者象收之誰

孟子稱孔子成春秋。而亂臣賊子懼。孔子以王法誅既死之姦回。著之方冊。萬世而下。昭如日星。舉而行之。不待教命。志於惡者。能無懼乎哉。曹操挾主以令天下。屠戮忠良。以及主母。卒盜神器。有王者作。殺其人。壞其室。污其宮。而瀦焉。人紀立矣。世衰道隱。大義不明於人心。至有書伐賊之師爲入寇者。嗟乎。悲夫。無乃與春秋之旨戾乎。夷陵之祠。悖理傷教。歷千百年。而無人爲之明焉。抑其習之久也。申屠公斥而出之。其可謂深知孔子之用心者矣。孟子曰。能言距楊墨者。聖人之徒也。夫楊墨之道。其流至於無父無君。聖賢且痛絕之。而況於身親爲之者哉。言空言也。猶有大功。而況於見諸行事之毅然者哉。嗚呼。後世復有孟子。而不曰申屠公聖人之徒。吾不信也。

題王右軍蘭亭帖

王右軍抱濟世之才。而不用。觀其與桓溫戒謝萬之語。可以知其人矣。放浪山水。抑豈其本心哉。臨文感

痛良有以也。而獨以能書稱于後世。悲夫。

說

天說上

或曰。天之降禍福於人也。有諸。曰否。天烏能降禍福於人哉。好善而惡惡。天之心也。福善而禍惡。天之道也。爲善者不必福。爲惡者不必禍。天之心違矣。使天而能降禍福於人也。而豈自戾其心以窮其道哉。天之不能降禍福於人亦明矣。曰然則禍福誰所爲與。曰氣也。曰氣也者。孜孜焉爲之與。曰否。氣有陰陽。邪正分焉。陰陽交錯。邪正互勝。其行無方。其至無常。物之遭之。禍福形焉。非氣有心於爲之也。是故朝菌得濕而生。晞陽而死。靡草得寒而生。見暑而死。非氣有心於生死之也。生於其所相得。而死於其所不相得也。是故正氣福善而禍惡。邪氣禍善而福惡。善惡成於人。而禍福從其所遇。氣有所偏勝。人不能禦也。曰然則天聽于氣乎。曰否。天之質。茫茫然氣也。而理爲其心。渾渾乎惟善也。善不能自行。載於氣以行。氣生物而淫於物。於是乎有邪焉。非天之所以欲也。人也者。天之子也。假於氣以生之。則亦以理爲其心。氣之邪也。而理爲其所勝。於是乎有惡人焉。非天之所以欲生之也。朱均之不肖。而以爲子。非堯舜之所欲也。螻蚋生于人腹。而人受其害。豈人之欲生此物哉。曰然則天果聽于氣矣。曰否。天之氣本正。邪氣雖行於一時。必有復焉。故氣之正者。謂之元氣。元氣未嘗有息也。故其復也可期。則生於邪者。亦不能以自容焉。秦政王莽是已。曰跖之壽。操懿之得其志。而子孫享之。豈天之有所私耶。曰氣之復也。有遲有速。而人之生也不

久。故爲惡之人。或當其身而受罰。或卒享福祿而無害。當其身而受罰者。先逢其復者也。享福祿而無害者。始終乎其氣者也。以懿繼操。以裕繼懿。不於其身。而於其後昆。謂天之有所私。不可也。故見禍福。而謂之天降于人者。非也。氣未復。而以禍福責於天。亦非也。不怨天。不尤人。歿壽不貳。脩身以俟。惟知天者能之。

天說下

或曰。天災流行。陰陽舛訛。天以之警於人。與曰否。天以氣爲質。氣失其平。則變。是故風雨雷電。晦明寒暑。者。天之喘汗。呼噓動息。啓閉收發也。氣行而通。則陰陽和。律呂正。萬物並育。五位時若。天之得其常也。氣行而壅。壅則激。激則變。變而後病生焉。故吼而爲暴風。鬱而爲虹蜺。不平之氣見也。抑拗憤結。迴薄切錯。暴怒溢發。冬雷夏霜。驟雨疾風。折木漂山。三光盪摩。五精亂行。晝昏夜明。瘴疫流行。水旱愆殃。天之病也。霧濁星妖。暈眚稜氛。病將至而色先知也。天病矣。物受天之氣以生者也。能無病乎。是故瘡癘。天札。人之病也。狂亂反常。顛蹶披摺。中天之病氣。而不知其所爲也。雖天亦無如之何也。惟聖人有神道焉。神道先知。防於未形。不待其幾之發也。堯之水九載。湯之旱七載。天下之民。不知其災。朱均不才。爲氣所勝。則舉舜禹以當之。桀紂反道。自絕于天。則率天下以伐之。元氣之不汨。聖人爲之也。曰。然則人勝天與。曰。天有所不能。而人能之。此人之所以配天地爲三也。曰。書曰。作善降之百祥。作不善降之百殃。非與。曰。此天之本心也。而天有所不能。病於氣也。惟聖人能救之。是故聖人猶良醫也。朱均不肖。堯舜醫而瘳之。桀紂暴虐。湯武又醫而瘳之。周末孔子善醫。而時不用。故著其方以傳于世。易。書。詩。春秋是也。高文。光武。能於醫。

而未聖。故病少愈而氣不盡復。和安以降。病作而無其醫。桓靈以鉤吻爲參苓。而操懿之徒。又加鳩焉。由是病入于膏肓。而天道幾乎窮矣。曰。然則元氣息矣乎。曰。有元氣乃有天地。天地有壞。元氣無息。堯舜湯武立其法。孔子傳其方。方與法不泯也。有善醫者。舉而行之。元氣復矣。作天說。

雷說上

有夫耕于野。震以死。或曰。畏哉。是獲罪于天。天戮之矣。劉子曰。噫。誣哉。何觀天之局也。一夫有罪。天將自戮之乎。天生民而立之。牧付之以生殺之權。而又自震以討焉。惡用是司牧者爲也。曰。天鑒于民。有隱慝焉。人罰弗能及也。而震以威之。微顯闡幽。神道也。曰。惡是何言也。古帝制刑以爲天下均。故執刑如執權。因罪之輕重而前知之。又不敢專。而聽于天。曰。天討也。夫是之謂贊天地之化育。今日。天又自以震戮人罪。吾不知天之所自戮者。以何等罪乎。謂其積之極。人不能勝而戮之耶。則天下之爲人子而不孝。爲人臣而不忠。爲人長而不慈。爲人幼而不孫。爲人友而不義。爲人妻而不順。賊義而戕仁。縱私而滅公。倚勢而行。姦乘約而肆淫。人言而獸心。陰慘而陽和。磨牙吮血。股膏刮骨。擅威作福。殘害正直。而道于司寇之誅者。不爲不多矣。豈司雷者有所畏乎。乃不一有戮。而庸夫乎戮焉。使彼有以覘天之意。而謂天之所怒在彼。而所容在此也。則恃以不忌。是天以震勸逆而濟禍也。豈天道哉。必不然矣。曰。然則雷何物也。曰。雷者。天氣之鬱而激而發也。陽氣圍於陰。必迫。迫極而迸。迸而聲爲雷。光爲電。猶火之出礫也。而物之當之者。柔必穿。剛必碎。非天之主。以此物擊人。而人之死者。適逢之也。不然。雷所震者。大率多於木石。豈木石亦有罪。而震以威之耶。

雷說下

或曰。雷有神焉。有諸。曰。人曰有之。曰。然則雷神所爲。而非氣矣。曰。否。雷與神。皆氣之所爲也。氣也者。無所不能爲也。忽而形。倏而聲。爲雷爲神。或有或無。不可測知。人見其忽而形也。而謂之神。夫神也者。妙萬物而無形。形則物矣。是故有形而有質者。有形而無質者。有暫者。有久者。莫非氣所爲也。氣形而神。寓焉。形滅而神復于氣。人物鬼神。或常或變。其歸一也。曰。旣爲神也。而曰不能戮人罪。何耶。曰。神形而暫者也。彼且不能以其形。惡能求罪人而戮之。

醫說贈馬復初

或稱醫藥出於上古聖人。神農黃帝。皆身爲之。其果然乎。儒者疑之。懼世之以是小聖人也。孟子稱堯舜憂民而不暇耕。夫耕。后稷實親爲之。豈以是爲非聖人之所事哉。天下之事。不止於耕。教之者。有其官。業之者。有其人。則堯舜之憂。不在耕。而有大焉者。此孟子之意也。天地闢而人生。蠢蠢焉。聖人出而後異於物。於是垂衣裳。造書契。作爲舟車。網罟。弧矢。杵臼之器。載在易經。不可誣也。凡可以前民用者。聖人無不爲之。而況於醫乎。辨陰陽於毫毛。決死生於分寸。其用心之難。又豈直舟車。網罟。弧矢。杵臼而已哉。吾固以有以知其作於神農黃帝無疑也。聖人之道。包天地。括萬物。一體而毫分焉。莫非道也。故天之大也。分而爲日月。爲星。爲雲。爲雨。爲雪。爲霜。爲露。莫非天也。而後各形其形焉。地之廣也。結而爲山。融而爲川。生而爲草。爲木。爲石。爲玉。爲金。銀。銅。鐵。爲五穀。莫非地也。而後各形其形焉。故見其形。而不知其出之原。非知道者也。是故知醫之不足以盡聖。而不知其爲聖之事。非知聖者也。今有酌海于盃。曰。海也。人皆知其不

可也。而謂之非海出也。可乎哉。天下之術多矣。惟醫以救死扶生爲功效。故志之者。可以存其不忍人之心。而於道爲有益。至於節嗜欲。調陰陽。時寒暑。去邪養正。流通血脈。其爲道也。引而伸之。治天下不能外致。遠而不泥。其斯而已矣。紹興馬復初。以醫藥從左丞帖理帖木爾公。招輯海寇。其爲人也。粹而溫。其於術也。精以造。其劑之所投。無宿疾也。予甚敬之。懼其日用而不知也。作醫說以贈之。

師子圖說

後狻。天下之猛獸也。而人能擾之。人亦靈矣哉。世有人而爲獸所食者。是不能靈其靈者也。人不能靈其靈。不惟不能以擾獸。而反食於獸。雖爲人。不如獸矣。吁。靈不如獸。而欲以制獸。則不爲獸所食。鮮矣哉。

菜窩說并序

菜窩者。宗姪彬之所以名其居室也。彬字宗文。少好學。有識而未用。其居在處州府城之東門。每求予爲文。而恆弗得暇。今年予來京師。而彬亦以儒士貢爲工部主事。因戲作菜窩說。且以勉而進之云爾。犁眉公謂東門子賤曰。子之居東門也。井地十畝。旣夷旣壤。俯壕爲溝。倚城爲墉。藩以枳林。緯以藁場。是蓋比如束鍼。鍊若攢鎗。蛇蝎不能求其縫罅。蚍蜉不能爲之穴隙也。何不墾之以種樹乎。又不耕之以藝稷黍乎。不然。何不大爲之池。分北山之泉流。以養鱉與魚乎。徒何爲乎築陋室于其中。壑糞土以爲壁。茨以腐茅。蟻蝸是宅。藉以瓦礫。羊蹄豕跡。與盼鼠爲主客。平明出門。不馬不車。不羸不驢。以造他人之廬。呼朋命徒。左躡右趨。談無用之空言。強相名而曰儒。坐視殷賑之腹。索爲蓬藿之區。不亦悲乎。吾聞燕秦棗栗。穰橙鄧橘。李梨。菓。秦杏。周漆。柿桃。柰。椶。琬容。瑛質。椅桐。栝。栢。堅。纘。有。瑟。桂。椒。萸。檉。吐芳。醇醖。木瓜。

樞椽。藟蕒葛芴。叢蔓轆轤。彼犖此苗。或庸其材。或以其實。或黃如金。或赤如日。翹蕭遠條。可蜂以蜜。克勤厥營。苟獲其一。富擬封君。受天之秩。范子所至。穿池種魚。史傳貨殖。盛稱陶朱。八口之家。五畝之宅。墻下栽桑。足以衣帛。今子不士不農。不商不工。綴籍州庠。口脍不充。人皆子嚙。子曷不憐。東門子賤聽之。愀然思之。杳然瞿然而作。再拜而作。立而言曰。公有言。吾獲矣。而吾亦有知焉。請以復於公。吾將以藝稷黍乎。則古人一夫受田百畝而給。今將以五畝爲宅矣。則所羨不過二十之一。不能以不飢也。抑將以種樹乎。則近者非四三年不成。不知遠者又幾年乎。不可以懸吾釜而俟鬻也。抑且爲池以畜魚乎。則我身畸耳。貨力於人。何日成乎。不可以曠吾肱而待汲也。今當種菜而鬻焉。尙庶幾哉可也夫。夫菜也者。采也。君子之所采也。或謂之蔬焉。蔬也者。蔬也。食梁肉者之所疏也。君子所采。而食梁肉者疏之。庶幾或者可以裕我矣乎。乃往訪于溪南之圃人。得膏土沃泉之術。菹四鄙之菜。類其族而種之。買牛牯一。犍二。鑿其菜蕪。芟去奧蕪。拔其荻杜阜翳。籜而燠之。穿井於其四隅。建桔槔焉。瀦水有池。洩水有渠。或培或滋。或叢或奇。灌溉攸宜。或耘或耔。踈稠比稀。慈穉舉肥。根莖實莢。各隨其時。羅之離離。檻之菲菲。未浹旬月。而東門氏之童。色澤如也。貌懌如也。窺其園則鬱鬱芊芊。入其門則盎盎春溫。有酒盈尊。他日犁眉公過焉。東門子賤御諸門。犁眉公咲曰。子亦足於斯而已乎。東門子賤再拜謝曰。吾願見公而有陳焉久矣。請坐於吾廡。而爲公言之可乎。公曰。吾願也。東門子賤曰。公能悉識吾菜乎。公曰。未也。請之園而言焉。曰。始吾之不營是園也。漠乎其無思也。今吾之既營是園也。惟其所以壯吾址而厚吾生。則非一日也。天地久其道而萬物生。聖人久其德而庶功成。士農工商久其業而百務貞。故植韭以爲之君。韭者久也。所以久吾生也。致

久必慎其揆。故植之以葵。葵者揆也。揆得其道。則視明而聽聰。故植之以葱。聰達。則得筭多。故植之以蒜。蒜筭也。筭不失家。必豐。故植之以薑。豐則彊矣。故植之以薑。薑強也。物大彊則過剛。剛過則折。君子戒焉。故植之以芥。芥者戒也。戒事者。思必苦。思苦則毒。故植之以茶。茶毒穰于中。而用力勤。故植之以芹。勤極則病。故植之以蒲。蒲痛也。病之劇也。病劇必弱。故植之以荏。荏柔而弱也。弱則微矣。故植之以薇。微。肝瘍也。肝微則羸。其行。故植之以萋。萋者僂也。愈病必以藥。故植之以芍。藥。藥攻病。不可失其養。故植之以鞠。鞠。養也。得其養而後蘇。故植之以蘇。蘇則起矣。故植之以芑。起必慎。以保其後。故植之以瓠。瓠者護也。護不違乎道。則難舒而福生焉。故植之以芷。芷者祉也。引祉莫大乎育德。故植之以蓄。蓄必有濟。故植之以薺。薺者濟也。濟自近而之遠。自卑而底高也。故植之以菘。菘者高也。高極必窮。故植之以芎。窮。慮窮者。必早計。故植之以薊。薊者計也。吾朝而游焉。觀其萼。萼菁菁。可以悅吾目。而暢吾情。夕而游焉。擷其芳。而茹其英。可以旨吾腹。而曼吾齡。又可以究吾知。而通物理。安得不悠然而未懷。怡然而自喜哉。夫吾廬。寓也。不足以延長者。而長者肯臨焉。不可以不志。請名之曰菜窩。願公爲吾誌之。犁眉公大悅。遂旅其菜。酌其酒。書其言而去。

問答語

賣柑者言

杭有賣果者。善藏柑。涉寒暑不潰。出之燁然。玉質而金色。置于市。賈十倍。人爭鬻之。予買得其一。剖之。如

有煙撲口鼻。視其中。則乾若敗絮。予恠而問之曰。若所市於人者。將以實籩豆。奉祭祀。供賓客乎。將銜外以惑愚瞽也。甚矣哉。爲欺也。賣者笑曰。吾業是有年矣。吾賴是以食。吾軀。吾售之人取之。未嘗有言。而獨不足子所乎。世之爲欺者不寡矣。而獨我也乎。吾子未之思也。今夫佩虎符。坐臯比者。泔泔乎干城之具也。果能授孫吳之略耶。峨大冠。拖長紳者。昂昂乎廟堂之器也。果能建伊臯之業耶。盜起而不知禦。民困而不知救。吏姦而不知禁。法斲而不知理。坐糜廩粟而不知恥。觀其坐高堂。騎大馬。醉醇醲而餖肥鮮者。孰不巍巍乎可畏。赫赫乎可象也。又何往而不金玉其外。敗絮其中也哉。今子是之不察。而以察吾柑。予默然無以應。退而思其言。類東方生滑稽之流。豈其憤世疾邪者耶。而託于柑以諷耶。

樵漁子對

樵漁之爲業。賤而且勞。有嗜之者。將終身者。察其私。非賴是以生。蓋隱者也。人有問之曰。夫嵩岱之木。不朽心而液節者。固將應棟梁之需也。幽冀之馬。不曳蹄而蹶膝者。固將駕瑤象之車也。天地之間。莫大乎人。觀子之容。坦坦施施。神氣盈宇。又偉且奇。方今聖明在上。旁搜俊賢。織芥之善畢舉。寸尺之長不捐。是故懷德抱材之士。莫不龍躍九淵。鳳翥高雲。傳岩無版築之老。磻溪起垂釣之民。藏器待用者。維其時矣。方當豹變風雲。接武龍襄。施澤于民。以措時宜。不此之圖。顧守污卑。翳蒼山澤。沒齒何爲。積肩汗體。跋履崖谷。銛觚覃刺。鑽膚如鏃。蹈蛇觸虎。動貽茶毒。清冷之川。大魚不處。鱗鱗瑣瑣。雜以蝦蚶。窮日之力。所獲幾許。朱門晨啓。歌鐘聒天。先生之竈。冷而無煙。銀鞍駿馬。照映狐貉。先生之袍。長不蔽足。徒懷荃而佩茝。長蕪沒于丘壑。甚無謂也。隱者笑曰。子不見夫炎洲之翡翠乎。巢居絕島之中。棲息乎陵苕之上。飲石底

之流泉食葭下之纖鱗。蔚羅不能加。弓弩不能及也。一旦乘風遠逝。汜濫乎江湖之間。飽魚蝦而飫稻粱。洋洋焉不知其所歸。虞人罔而撤其毛羽焉。向使守分而居。孰得而致之哉。故曰貴賤命也。窮通時也。是以鷓鴣不思霄漢之翔。麋鹿不羨攀緣之能。故能全其身。今子之云。是欲刻蒿以射犀札。植菰蔣于千仞之崖。而冀其實也。且今之遇于世者。何如耶。附勢趁權。病于深谷之頽肩。憂讒畏譖。過于蛇虺之螫毒。學古入官。試用有司。責任何弘。俸祿何微。苟虛名之日著。亦奚救于寒飢。若夫高屋大廈。百鬼所闕。妖服賈禍。先哲時鑒。是豈野人之所願欲哉。采山林以食力。釣清冷以自適。日高而起。日入而臥。目不接市肆之塵。耳不受長官之罵。俯石泉以瑩心。攀芳蘭以爲藉。榮與辱其兩忘。世與身而相謝。若是者。吾庸多矣。吾又何所求哉。問者退而言於子。子惟其言近乎道。故志之。隱者居桐江。不知其名。人謂之漁樵子云。

荅鄭子亭問齒

卑闕之歲。招搖指于乾維。鄭子與客過予。速酒登肴。踐豆揚卮。載爵載呵。艤鸛鞴。有聲砉然。上通崑崙。天旋霧濛。條燦晝昏。顛倒室廬。衆賓愕貽。懵不知其由。有神羅吞。踟跳而前曰。予神也。實司子牙。今子之居。泐矣。龜兆拆矣。予無所宅矣。吁。子厄矣。子且何以處我。予未及應。而鄭子代予爲文。浩浩湯湯。噴雲披風。予憊弗能荅也。酒盡客去。予呼老羅而謂之曰。子爲神乎。含靈有牙。將子是司。子擇予居。予弗子辭。相彼牧夫。牛羊是守。虎狼搏噬。伊誰之咎。大木將顛。本必先撥。瘡而築之。庶其不斃。子實司齒。而不我扶。不我夙告。以俾我瘖。鍵腐樞摧。闢何爲乎。子名爲神。而不保乃宅。以亢乃身。弗攘垢以自訟。而語余以云云。子去矣。子之醜莫大矣。夜分就寢。老羅左執鞭。右引蓑索。縛一小鬼。其狀蝻蝻。蝻蝻。赤首虺身。頭若枳傷。

曰。是所謂螻蛄者也。實蝕子牙。請戮之。以釋我尤。於是斧鑕既陳。且訊以言曰。來女螻蛄。人齒女居。弗齒。曷依。齒固女活。齒潰女絕。曷其弗察。列鼎之家。熊蹯豹貓。梅酢姜辛。青蚨味醎。桂蠹冰蛆。密啣蜂蜚。滲液腥涎。蒼橘黃橙。木瓜作酸。鑽堅磷剛。砭剝女膚。知女所在。挑女剔女。鈎女摘女。蜀椒鶴蝨。浮潰攻刺。索女于室。糜潰女質。拔其枵殼。投之瓦礫。植以髓骨。女悔曷及。今我之牙。疏芳漱清。吐辭蘭馨。乾肺弗噬。腊肉弗嘗。白鹽赤米。蠶汁泔淡。含咀天和。康女以居。女實予依。予不女虞。胡弗戚乃心。以作惛淫。用礪析女家。以離予之輔車。今當艾爾元。殘爾軀。剝殄滅爾種。爾罪有餘。螻蛄聞言。蒲服頓伏。脞首觸地。仰而噓天。嗷嗷而言曰。微生罔知。壽命先生。匪牙曷居。豈其弗思。而自絕于居。停主人。主人戮我以罪。我弗敢避。雖然。願得一言而死。死且不朽。先生獨不聞夫穆天子乎。天子驂赤騮之駟。服翠黃之乘。造父爲御。西游瑤池。觴王母于帝臺。靡靡娛娛。窮年歲而忘歸。天下睢睢。如鳥失棲。造父大諫。天子弗聽。造父乃埋其輪而朽之。以示天子。天子始寤。疾馳而還。則半四海之諸侯。已委贄于鵠倉氏之庭矣。是謂債車之轍。故其知者。以造父爲忠。不知者以爲不恭。由今觀之。是耶非耶。今先生之生。四十有一年矣。心隨物遷。志與景赴。日復日。暮復暮。泯泯然與草梗同腐。而不知隙駒之度。朝華迎霜。以爲冥靈。螭蛄吟秋。以爲神龜。外彊中乾。奄爲枯樞。而猶不覺爲我。聞孔子大聖。四十不惑。聲律身度。永世作則。孟子四十而不動心。知言養氣。垂名至今。今夫先生之心。憤憤怵怵。飄若浮煙。言交于前。躁吉罔甄。氣憑于中。蓬勃慄天。激物動懷。以滑而魂者。日不知其幾矣。且夫四十無聞。君子恥之。先生閉門而坐。冊不離目。筆不離手。日著千言。而不章于人口。留之身後。以覆醬瓿。徒何爲乎。玄華銜容。藻禩以夸。丹元冥迷。偷以爲安。羅公知之。而不辰告。微生

獨不能忍。且悲且悼。竊願有陳。而閉錮堅確。牢不可發。乃鑽乃齧。垢垢以出。不然。其得見於先生耶。且先生之齒。三十有四。而未嘗以之嚼大肉。截大截。芹藻葑菲。柔脆輒美。餽之以舌。可使成膏。又惡用是三十齒爲哉。吾今遠慕造父。近效史魚。使先生因齒脫而知邁。感齒剛而知戒。日乾乾乎。彌厥愆乎。以踵屬于聖賢乎。則走也有功於先生多矣。乃不蒙賞。而以爲戮。言未既。劉子惕然大寤。酌而醢之。書其言以自警。

愁鬼言

歲次玄枵。律中林鍾。北山起雲。南溟來風。土潤溽暑。蒸鬻黧而爲虹。岑峯先生。獨處不憚。筋嬾肉緩。體倦志頹。形神枯瘁。精氣消鑠。頽乎岸塌。澹爾冰泐。口不能言。心意迷惑。敗敗泯泯。若有求而不得。龍門子使賈生診之。賈生曰。異哉乎。先生之疾病也。若陽非陽。若陰非陰。沒沒潘潘。倏浮忽沉。其來無蹤。其去無迹。吐之不出。下之不泄。汗之不液。針不能刺。艾不能灼。其在丹元之宮。爽靈之室乎。龍門子恠而伺于其寢。是夕也。玄雲往來。月色黯黯。凄風吹衣。陰氣肅穆。颯颯率率。恍若有物。入自壁隙。閃閃覿覿。啼啼媿媿。肝肝歔歔。若滅而沒。如有形質。龍門子使保兒招而問之曰。女何祥也。昊蒼賦形。至靈維人。游魂爲變。歸鬼伸神。女爲神耶。將德是憑。廟貌血食。福善禍淫。正直聰明。享于克誠。胡不召而日至。蹈穢褻而爽德馨。其鬼也耶。形氣殊途。幽顯異致。女身安屬。女神曷寄。冥乎漠乎。非我族類。胡爲來哉。吁可畏乎。憎於人也。於是其物螻螻而前。踉踉而却。睢盱繇繇。載躔載躔。啾啾嚙嚙。而致詞曰。我愁鬼也。生于昧曠之野。而長于鬱厄之鄉。其出無朋。其動無常。其去無方。飢無以爲食。渴無以爲漿。風雨颯灑。無以爲居。廬霜雪凌冽。無

以爲衣裳。恒矇矇以儻儻。惛惛其如傷。或乃噫氣成城。噓憂爲陣。當之者蒙蒙。中之者暈暈。巫陽見而哀之。爲我請于上帝。上帝惻然。乃詔咎繇。審厥愆由。命巫陽賜我六窮之符。使游人間。帝命若曰。惟鬼無依。將人是依。王公大人。積德爲基。運亨福宏。女不可窺。猗頓陶朱。大屋高垣。徐饒守門。女不可干。達人。大觀。知命不憂。與女異志。女不可投。趙趙武夫。無所畏懼。大膽如瓜。見女必怒。癩癩店店。載柔載纖。旖旎沾黏。則不女嫌。低首下氣。如膏如膩。暗鳴涕泗。則不女忌。女往自擇。無有差忒。旣得女所。順與之處。我乃再拜稽首。受命以還。聿求同志。以爲依歸。久矣未能得也。間嘗乘子之虛。入子之廬。歷相羣公。下逮僕夫。莫不笑語嬉嬉。步履舒舒。喜色著于眉宇。精神滿於身軀。諱所尙之鑿柄。知不可以與俱。於是遂巡却立。曳足欲逝。微風入耳。忽聞馨欬。委霍呬唾。嘆緩纒帶。迫而視之。得一人焉。華髮半禿。發言遲滯。舉趾局促。頽乎若將覆之墻。瘡乎若不食之鵠。面蹙薰瓠。膚凋槁木。憂容不霽。瘴氣可掬。伺而知其岑峯先生也。於是因彭矯以見先生于宵寐。先生果憐而收我。舍我於靈府之中。食我以丹田之瓊糜。飲我以華池之芳泉。方期與我出處。以終其天年。龍門子大驚。亟呼左右。挺劍擊之。其鬼黝然而消。乃命賈生。發囊傾瓢。作大齋以投之。岑峯先生汗然汗出。妯然而知。詰旦魂返魄定。歸神聚氣。筋骨植立。不知沉疴之去體也。

解

拙逸解

建業冷繼先。以拙逸自名。徵予言。作拙逸解以遺之。其詞曰。

灑洛先生蓬廬簾門徑不通人。庭不容車。與人言如不能發口。食已則臥。衣敝而不能補。帶結而不能解。人皆笑之。以爲拙。莫之與往來。耀華公子過而問焉。朱輪五十乘。驪駟騏駼。困于枳枸之根。登丘而呼。先生方熟寐。覺然而起。無能取于其涂。窺墻而見客。公子曰。噫。悲哉。拙乎。夫人之生。參天與地。抱智含仁。挺爲物先。出類超羣。厥維上聖。飛龍九五。爲民立命。大賢以下。德各有倫。乃棊乃翼。以臣以鄰。公侯伯子。岳牧師長。下逮百工。農商藝術。巫師馬醫。莫不有能以用于時。吁。嗟先生。獨何爲乎。齒髮其生。而土石其歸乎。先生不荅。公子趨翼而前。揖而言曰。楚國有鳥。三年不蜚。蜚則冲天。三年不鳴。鳴則驚人。僕聞大巧若拙。今夫先生。無乃是耶。僕也不才。五歲誦詩。七歲誦書。上貫三墳。下通百家。晨興習禮。宵坐肄樂。射御星曆。隸首所作。方程勾股。卜筮農圃。孫吳申韓。扁鵲俞附。九流六藝。靡不究極。總角而成。弱冠而升。爲公爲卿。躋于王庭。是故出則駟馬高車。前後塞途。入則大屋華堂。陳鼎擊鍾。銀鞍金絡。執鞭以候。僕者數百。騎通門列肆。待僕而食者數百家。政令非僕不行。法度非僕不立。禮樂非僕不作。訟獄非僕不決。軍旅非僕不治。庶民非僕不親。賓客非僕不悅。賢不肖非僕不能進退。君王之心。非僕不能一日安于岩廊之上。吾願與先生言之。先生俯而哈。仰而嘆。睚盱卻立而謝。客曰。公子過矣。吾聞鉛刀不可以割羊。朽籜不可以樹墻。王良不彊。驚駘以驂服。而匠石不責。樸櫨以棟梁。公子過矣。萬物並育。巧拙參焉。巧者爲之。拙者隨之。天之道也。故諺有之。巧者拙之奴也。是故乾鵠拮据。鴝鵒養雛。蒼鷹搏鹿。螻蛄食血。由此言之。豈不信哉。是故仲尼多能。坐不煖席。墨卻雲梯。走不黔突。豈有他哉。巧害之也。是故神龜焦于先知。渾沌死于鑿竅。原伯魯不獲承祀。而沈竈產鼃之難。亦不與焉。巧之與拙。何得而何失哉。故大禹治水。手胼足胝。而

虞旬之氓。皞皞熙熙。文王卽功。日不暇食。而周野之蒙。不知帝力。亦獨何哉。巧與拙也。今予無所知也。而天下之慮。無役于予心。無所能也。而天下之務。無加于予身。起而食。偃而臥。順天之生。而無所矯揉焉。予之逸也。予之拙也。予又何所求哉。已矣。公子。君子巧之。小人拙之。君子勞之。小人逸之。彼巧而勞。此拙而逸。再拜謝客。塞門不出。

雜解

言之中於人也。慘於兵。故其爲身害也。甚於殺人。夫言之傷人。未至於殺也。而志在是焉。則人之防之。烏得而不嚴。書曰。惟口出好興戎。君子之所以慎其言也。畏其興戎也。

非所馮而馮焉。昧也。非所篤而篤焉。悔也。昧而悔。禍其至矣。雖憂何及哉。詩曰。肅肅鵠翼。集于苞棘。傷之而已矣。

君子之所以守其身者。禮與樂也。禮不及。則失其威。其敵也。侮。樂不及。則失其惠。其敵也。殘。侮則人陵之。殘則人疾之。詩曰。終南何有。有紀有堂。君德也。

人各有所能也。物各有所庸也。非所任而任之。事必蹶。非所施而施之。功必圯。是故有天下。未嘗無人也。有人。未嘗無用也。用得其當。謂之得人。用失其當。謂之失人。詩曰。椅桐梓漆。爰伐琴瑟。古之人所以立而不頓者。不失人而已矣。

禁民之爲不善。善也。非善之善者也。化不善使之爲善。善也。善之善者也。非人之所及也。天下無不可化之民也。政不至於化。不可謂之善也。中庸曰。夫政也者。蒲盧也。蒲盧也者。果蠃是也。詩曰。螟蛉有子。果蠃

負之。教誨爾子。式穀似之。喻民之無不可化也。

人有不交而求者。必其有所謀也。有不約而至者。必其有所爲也。故惟禮可以沮暴。惟誠可以破詐。易曰。有不速之客三人來。敬之終吉。君子之所以不自失者。豫定而不躁也。

人之爲觀美者。將奚事乎哉。型土以爲器。而髹之。知不可以利吾用。及其敗也。祇足以委吾盛。而猶有樂爲之者何也。詩曰。蜉蝣之羽。衣裳楚楚。鄙之也。

虎之在山也。隱隱然。微振其頰領。人與獸莫不駭也。繫而檻之。雖咆莫之畏矣。易曰。困亨。有言不信。夫旣困矣。雖默猶恐其及也。而有言焉。人誰聽之。祇重其疑而已矣。

衛公子壽

予讀春秋傳。衛公子壽。與其兄爭死之事。及詩。載馳河廣之篇。而深有感焉。夫以衛宣公與姜氏之行。而生壽及宋桓許穆夫人。豈習其家法然哉。而制行過人如是。民之秉彝。不可泯也。抑又何多耶。以文王太姒之聖。而有管蔡霍叔。昔人之所謂胎教者。非矣。宋有雀生麟。殷祀以亡。物生非其類。人以爲妖也。人之生不以類若是者。其又何耶。

夏后氏之效

祭法曰。夏后氏禘黃帝而郊鯀。鯀固夏后之父也。夏后之天下。受於舜。非受於鯀也。禹不得以天下私其父。夫鯀以治水績用弗成。而舜殛之羽山。天下咸服。則鯀天下之罪人也。故舜之刑。非私刑也。天刑也。以天刑討天下之罪人。天下之至公也。禹旣受舜禪。而升其罪人以配天。是舜之殛鯀。非也。夫鯀之殛。獲罪

于天。天殛之也。非舜殛之也。奉天討也。而以鯀配天。是天之殛鯀。亦非也。一私其父。而逆于舜。又逆于天。天其弗享。夏后氏之郊矣。禹。聖人也。而敢爲是哉。祭法之言非也。然則禹之於鯀也。如之何。曰。廟以祭之而已矣。

君子非有恭敬則不齊

祭統曰。君子非有大事也。非有恭敬也。則不齊。是非所以語君子也。夫君子之所以爲德者。恭敬而已矣。恭敬也者。不可須臾離也。故孔子之語仲弓曰。出門如見大賓。使民如承大祭。大雅之述文王曰。於緝熙敬止。又曰。不顯亦臨。無射亦保。聖人無一息之不恭。且敬何待乎齊。齊所以篤其恭敬。猶恐其有未至而致之。聖人不自瀟假之心也。謂之非有大故不齊。猶可也。謂之非有恭敬則不齊。大不可也。信斯言也。是不齊之時。不恭敬矣。豈所以語君子哉。其悖也甚矣。或曰。然則所謂不齊。則於物無防也。嗜欲無止也。如之何。曰。其疵同也。大抵漢儒記禮之言多駁。往往流于文而失于理。取其長而去其短。可也。

文

送窮文

余夢有物兮。龍首人身。蓬頭鼠目兮。其音若呻。跳踉蹙冶兮。若遠而親。歛往春來兮。忽笑以顰。覺而異之。乃具糗芳。潔豆觴。過老郭而問之曰。是何祥也。郭子寢然啓櫝。拂馨密沕而筮之。遇困之兌。其繇曰。困于埳。宄中有狐。舉趾躡胡。毀踵及顛。其泣嬰如。恣睢臙腴。孔隙以窺。以垢如脂。彳于追隨。求速得遲。郭子釋

策而笑曰。是窮鬼也。其爲物也。入山山空。入澤澤荒。人而遭之。窮不可當。載拔載禳。遣之他方。可以無殃。余曰。苟然矣。遣之何居。郭子曰。子第爲之所。我請爲子逐之。余曰。唯唯。乃致詞曰。嗟爾窮鬼兮。無處我廬。八牕洞朗。廓以虛陟。釐兔頤有圖書。蠶菹糲食。菽與蔬。守分自足。不求餘。汝不可留。阻步趨。左有鬱壘。右有荼。菁索縛汝飼老烏。嗟爾窮鬼兮。無泊我市。九衢四達。平若砥。高樓大屋。鬱雲起。冠裳濟濟。集俊士。謀謨折衝。格遐邇。汝不可往。耗儲備。山川靈神。歆穆祀。孟涂司刑。伐爾死。嗟爾窮鬼兮。無依我城。垣墉睥睨。高不可陵。溝澗深浚。柅以荆。重門擊柝。鍾鼓訇。斥堠謹肅。列旗旌。汝不可往。搆妖獰。健兒披甲。眼若星。長戈勁箭。穿爾形。嗟爾窮鬼兮。無適我野。田疇井井。治而不莠。禾麻豆麥。梧梓檟。華華蔚蔚。被籛黠。歲時禋祀。達方社。汝不可往。原隰赭。朱衣赤郭。騎駿馬。執汝鬪肉。燔其裸。嗟爾窮鬼兮。無上天。高明行健。覆八埏。轉旋日月。照幽玄。溫涼噓吹。寒暑煎。陶冶萬物。成歲年。汝不可往。亂星躔。黔羸憑怒。施椎鞭。破骸碎骨。喪爾元。嗟爾窮鬼兮。無下地。博厚載物。生育庶類。江河順流。山岳峙。融結蓄洩。百寶出。洪纖蠢頑。各奠位。汝不可往。坤軸躔。黃示土。伯咸震。恚艾殄。爾種灰。厥骹。嗟爾窮鬼兮。無潛于山。岩磬石核。立鍵關。丘陵陵麓。產植蕃。閔隔風氣。限夷蠻。頌雲腹雨。濡旱乾。汝不可往。鼓神姦。涉蠹泰。逢毛虎斑。噬膚嚼肉。流血殷。嗟爾窮鬼兮。無入于水。大瀛包納。川瀆委。疏煩洩穢。通脉理。魚鹽蟹鰕。奏鮮旨。蛟鼉龜鼃。藏譎詭。汝不可往。陵谷坻。天吳九頭。插九尾。磨牙吮血。糜爛爾已。大泊蕩蕩。無涯垠。青冥杳茫。不見人。曹曹漠漠。混昏晨。瀉之不虛。壅之不堙。不甘不苦。淡以淳。汝往居之。寂無鄰。乘騎光景。入網緼。保全爾軀。絕詬噴。汝不寤兮。滅爲塵。急急如律令。

諭甌括父老文

告甌括父老。皇朝以武德一九有服而不殺。燠休滋潤。罔有荼毒。至今八十餘年矣。父老目不覩旌旗。耳不聆鉦鼓。茹蔬飯稻。哺孫育子。早臥晏眠。優優坦坦。通無販有。蹈山涉水。不覩不類。誰之賜歟。帝德寬大。務在休息。與百姓安樂太平。故禁網漏而弗脩。官缺其人。偷惰潛生。以不能宣德化。達壅滯。咎在有司。非主上意也。今父老子弟。不察其故。對暑嗟寒。徒怨于天。乘間造釁。竊弄戈兵。睚眦跳踉。曼及艸木禽獸。率遏厥生。所過所止。山夷土赤。甚亡謂也。百姓無辜。籲號于天。驚動天心。天子乃授鉞左丞相曰。其從便宜。死之生之。無倚無頗。丞相矜念小民。謂不教而誅。有辜帝仁。詢于庶言。知使者父老鄉里姻戚。與父老故無惡。爲能奉揚朝廷仁恩。以啓迪父老。心不逃傷。是用發傳。俾使者來諭父老。冀父老各體上意。約束其子弟。變極作福。以活乃胤。屬俾引勿割。惠至渥也。今使者至郡。且彌月矣。布告已至。而父老子弟。猶豫未決。使者實愚朴。不能測人意。而嘗聞大君子之教曰。惠迪從逆。吉凶猶影響。火生于木。厥惟自灼。匹夫不可讎。況敢觸天子丞相怒乎。大命不僭。大恩不再。怨可釋。不可結。亂可已。不可長。冥行弗返。厥途乃窮。易曰。不遠復。無祗悔。元吉。又曰。迷復凶。父老念哉。語曰。因不失其親。亦可宗也。使者雖微。丞相命也。惟父老審圖之。無自失厥時。以貽悔莫及。

誠意伯文集卷之八

銘

尊聞堂銘

皇降恒德。我儀受之。情牽物交。民鮮克有之。卓彼聖哲。有關於先。弘猷秩昭。續緒維賢。凡有所聞。恭敬奉持。造次必將。屋漏勿欺。洋洋鬼神。饒饒震霆。寢斯食斯。或敢弗承。厥聞伊何。闕疑擇善。靡聖天只。克念不遠。人亦有聞。罔知所擇。楊墨仁義。乃德之賊。亦旣擇止。罔知所尊。郭公善善。國喪身奔。聞義必爲。聞過必徙。能尊能行。是謂君子。戴生有堂。扁曰尊聞。用宏厥理。昭以銘文。

敬齋銘 并序

敬齋者。篤列圖彥誠。所以名其居室也。彥誠以科第發身。其於敬字之義。蓋亦講之熟矣。則舉其所知而行焉可也。又何必多求乎人之言哉。乃勉而爲之銘。銘曰。

莊其外而肅其內。瓊琚玉佩。無顯無昧。惟鬼神是對。肆遏蹶弗憤。以不越載。以求無有悔。

奎上人耘杖銘

奎上人得古藤以爲杖。而置鋤焉。將以兩其用也。名之曰耘杖。而劉基爲之銘曰。

譽可以取魚而不可以繫駕。帶可以繫襦而不可以貫珠。孰眇其羶而多乃需。既予老是扶。又蕞莽之除。俾康勿起。以弗迷厥塗。杖乎杖乎。歲月逝夫。子也子俱。

朱伯言硯銘

鑿而容既澤。既龔俾惟以爲鋒。克相予工。厥惟爾庸。予所弗工。維予之恹恹。式噩沒以攻。無貽爾慄。

紹興能仁寺鍾銘 并序

嬾翁禪師。既住大能仁寺之明年。新鑄大鐘成。括蒼劉基銘之曰。

赤堇之金。耶溪之銅。弗鐸弗鋒。而以爲吾鍾。撻之鏗鏗。靡幽不通。以暢八風。闔陰關陽。式贊化功。於萬億年。與皇家相爲無窮。

醒齋銘 并序

醒齋者。蘧君德芳。所以自名其居室也。蘧君少嗜酒。數爲酒所困。一旦忽思。古人之所以喪其身。覆其家者。大率多於酒。遂絕旨酒。而以醒齋署其居。用以朝夕警省。而杜其欲於將萌也。括蒼劉基聞而喜其善脩慝也。故爲之銘。使揭于楣。且以堅其志。銘曰。

禹疏儀狄。祇承虞帝。湯傲醪歌。用末厥世。維衛武公。初筵有詩。年踰九十。令聞不墜。在魯仲尼。酒不及亂。範模萬古。愈久彌粲。羲和酒淫。胤后徂征。楚國皆醉。鄢郢榛荆。次公北闕。仲孺東市。狂談醜罵。身戮家毀。吾以是知。昭昭生于惺惺。而憤憤出于冥冥。劉躡受執。孔融被刑。莫不因此。以殘其形。古稱覆轍。後車勿蹈。有縱弗防。禍生所好。人孰無過。弗改維咎。知過而改。何過之有。維敬與怠。狂哲攸分。敬醒則存。不醒則

昏于嗟。遽君以我諄諄。止爾黷黷。有苗弗芸。視此銘文。

玉兔泉銘 井序

自古有以勢軋天下。箕人口使和已者。鮮不由細微以及大。此姦人之素能也。故高之馬。莽之祥瑞。惟其言而莫之違。然後大詐行。而大欲得矣。秦檜之事宋高宗也。以岳將軍之武之忠。且排搆之。殺其身。以及其子。反以爲功。而宋之君臣。莫不從其指。則亦何求而不得哉。玉兔之泉。以清美爲建業城中第一。豈昔顯而今堙者。檜實知之耶。或有善察土脈。工穿井之術者。密以語檜。而神之以白彘耶。則皆不可知也。夫檜之罔民設詐。豈下於高莽哉。白兔之是非。無關天下之大事。是故賢人君子。忽之而莫與較。於是乎鄙夫諂子。遂探其意而夸之。以爲佞。是蓋不足辯也。金華張孟兼憫泉之芳潔。爲姦人所污。而銘以雪其冤。愛物之良心也。予亦悲之。爲之作後玉兔泉銘。銘曰。

嗚呼泉乎。夫何辜爲檜所污。世無吳隱之。孰昭其誣。嗚呼泉乎。尼父大聖。猶言其主瘠環與癰疽。白兔之傳。夫何傷於爾歟。檜死爲蛆。泉潔自如。我作銘詩。衆惑斯祛。嗚呼泉乎。終古弗渝。

王原實裕齋銘

會稽王原實。以裕名其齋。括蒼劉基爲之銘曰。

寬而舒。綽綽乎有餘。佩裾與與。有容弗据。德人之閭。過者式諸。

頌

梅頌 井序

吳興章仲文築室花谿之上。環植梅焉。命之曰梅花之莊。予與仲文交。敬其好學而知德也。知其有取於物。不徒矣。乃效屈子頌橘之體。而作頌曰。

朱方之秀。梅實碩兮。含章而貞。愛命獨兮。扶疎蕭森。清以直兮。玄冰沍寒。不撓其節兮。玉之潔兮。夷之特兮。閉而發兮。芳郁烈兮。黃中絳跗。美而完兮。麗而不淫。物莫能干兮。冬榮夏實。含陰陽兮。青黃纍離。以和羹兮。文質彬彬。德之儀兮。君子之象。君子之宜兮。

箴

順齋箴爲夏仲琮作

二儀茫茫。繫理是物。判以兩途。維逆與順。理之所在。漠乎無形。曷予求之。卽事以明。利劍吹毛。不柄之持。北轅適粵。徒勞何爲。堯舜理物。因利除惡。緜堙洪水。彝倫攸斁。勢順則強。氣順則舒。天地順動。百度弗渝。待時而行。處順以守。君子作箴。敢告左右。

守口如瓶箴

吳君以時書守口如瓶。以自警。徵予言爲作箴曰。

維人有口。瓶亦有口。瓶口弗守。喪厥受人。口弗守。速厥咎。口乎口乎。其禍福之門。而一身之樞紐乎。人有瓶也。尙克固之。胡然有口。而不知度之。維言如泉。維口如隄。有出勿稽。爲河爲谿。激石揚泥。追不可回。故

曰好言自口。莠言自口。又曰君子無易由言耳。屬于垣。守口如瓶。末矢勿設。

敬齋箴 井序

蒙古氏宗道之先。出自山西。而以儒世其家。故名其燕居之室曰敬齋。載世德也。先正有言曰。經禮三百。曲禮三千。一言以蔽之曰。毋不敬。敬也者。其萬事之根本與。故聖人之語君子。惟曰。脩己以敬。故禹湯以克敬而王。桀紂以不敬而亡。自天子至于庶人。豈有異哉。故曰。穆穆文王。於緝熙敬止。又曰。昊天曰明。及爾出王。昊天曰旦。及爾游衍。敬也者。不可湏臾離也。宗道勉乎哉。克念作聖。敬而已矣。作敬齋箴。其詞曰。

心敬則存。而不敬則昏。事敬則立。而不敬則跲。克臧自我。否臧自我。如之何以。可維謚維專。式莊弗僂。臧之淵淵。出之虔虔。俾中不偏。有握勿捐。旣悠旣堅。無不顯或愆。無息弗乾。熟之者聖。守之者賢。故曰。敬勝則吉。怠勝則滅。敬而無失。聰明睿智。皆由此出。事神治民。舍是無術。是用作箴。以謹燕昵。

官箴上

維天生民。儻儻蚩蚩。有欲罔制。迺豹迺螭。爰立之君。載作之師。式養式教。毋沮乘彝。嗟爾司牧。代君撫綏。君祿我食。君今我施。邦本弗固。庶事咸墮。受寄匪輜。敢不肅祗。治民奚先。字之以慈。有頑弗迪。譬之以威。振惰獎勤。拯艱息疲。疾病顛連。我扶我持。禁暴戢姦。損羸益虧。如農植苗。蚤夜孜孜。澆躩旱旣。無容稗秕。如良執輿。順以導之。無俾旋濘。彊策以馳。慈匪予愛。帝命溥時。威匪予憎。國有恒規。弱不可陵。愚不可欺。剛不可畏。媚不可隨。無取我便。真人于危。無避我謗。見義不爲。天鑒孔昭。民各有思。惠之斯懷。推之乃離。

譽不可驕。器惡滿。敬。謗不可怒。退省吾私。人有恒言。視民如兒。無反厥好。以暴予知。是用作箴。敢告執羈。
官箴中

在昔隆古。分封國都。付之以民。俾養勿瘠。上下協心。各保乃區。明庶考績。昭哉範模。秦廢聖制。代德以徂。刀筆之權。始歸吏胥。弄法舞文。叢癡警愚。流波至今。一任簿書。行立公庭。如鴈如鳧。我欲是求。我利是趨。摩揣官情。以逞覬覦。官惟好貨。我甘以苴。官惟好名。我逢以諛。官惟畏嫌。我疑以汙。官惟好憎。我淫以娛。官惟好猜。惑以多途。官惟好威。道以掎擻。語默有爲。俯仰有須。覘容察辭。助忿乘愉。法度盈口。奸邪滿壺。蠱智迷昧。欺庸陷迂。俾好作惡。以紫爲朱。未獲官心。嫗嫗儒儒。亦旣獲止。如登天衢。傲兀民士。憑陵里閭。惡積禍來。官與之俱。人有恒言。遇吏如奴。堅防固隄。猶恐或窺。矧曰聽之。百姓何辜。是用作箴。敢告僕夫。

官箴下

無謂余明。人莫能昧。離婁善察。不識其背。無謂予能。人莫敢欺。校人烹魚。子產弗知。立事惟公。燭詐惟誠。小節勿固。小慧勿行。無矜我廉。守所當爲。無沽我名。以生衆疑。何以簡訟。決之使通。何以弭貪。慎檢乃躬。去讒斥佞。遠吏近民。待人以寬。律己以勤。無咎人弗信。忱至斯孚。無患人不聞。惟德不孤。德以進善。威以挫姦。德不可偏。威不可煩。無謂彼富。我必極之。無謂彼貧。我必直之。持心如衡。以理爲平。無爲避嫌。以縱無情。人有恒言。爲臣不易。是用作箴。敢告有位。

靈峰寺植木贊

靈峰寺有松杏與樸。並植焉。劉子見而感之。爲作贊曰。

杏葉葱芊。有子可以實籩。松枝扶踈。有苓可以引年。樸狀如栲。衆蠹所穿。擁腫液臍。不可以鑷。胡並植于庭。混厥醜妍。明堂求材。般趨爾先。松戕杏割。樸獨宛然。嗚呼。樸乎。孰女之憐。維女之全。抑棄於人。乃獲乎天耶。

畫龍贊

鯀其角。蒼其鱗。蚘其身。胡爲乎而神。至陽之精。健與天倫。形而求之。惡識其真。于嗟龍兮。

碑銘

北嶺將軍廟碑

諸暨東北百里。爲蕭山縣。其山曰北幹之山。浙水帶其陰。湘湖匯其陽。東望會稽。至于大海。日之所出。其上爲星紀婺女之辰。故其神爲甚靈。能祛疫癘。作雲雨。人有所祈。必應。故立廟于其山。尊其神曰此嶺將軍。歲時祠焉。宋徽宗時。方臘反睦州。自睦入杭。具舟將渡江。吏民大怖。相率禱于神。比寇至。卽有風逆其舟。且見甲士列岸上。甚衆。乃止不敢渡。寇平。知越州劉幹。上其事于朝。賜額曰武佑廟。後封顯應侯。再封靈順顯應侯。有元至正十二年。妖賊入江浙行省。烽火通于蕭山。百姓驚竄。市井皆空。主簿趙君某。至縣甫八日。卽自往西興。募民備禦。而江上守兵甚寡弱。無賴子競起爲劫。且應賊衆洶懼。君詣廟卜于神。神

許之吉。衆心稍安。君乃分遣人捕無賴子爲劫者。悉誅之。有自賊中來言。賊欲遣兵攻浙東。見江岸列甲卒。旗幟如陸寇。欲渡時。以故畏憚無東心。及賊退。邑人皆德趙君。趙君曰。吁。茲惟神之功。予何庸焉。明年夏大旱。君往禱。又輒得雨。衆益信神之靈。而大敬趙君之能以誠感神也。廟在山之岡。歲久朽壞。惟神所居室獨存。君每至廟謁。念無以報神貺。乃以其俸錢作新廟。邑人亦大喜。爭致助焉。十有五年春。廟成。爲堂三間。三門兩廊。像設器用無所不備。惟所獨存堂仍其舊。繚以垣墉。整以瓦石。植以嘉木。丹堊輝映。吏民趨走。承祀益肅。以虔。時三月壬寅。予自杭還越。過蕭山而廟適成。故趙君請予記。按祭法有能禦大災捍大患。則祀之。今神能降雨澤。蘇枯槁。又能陰力卻賊。以能保全其民物。所謂禦災捍患。孰有大於是哉。廟而祀之。誰曰不宜。趙君能愛其民。故能以敬事神而獲其佑。可尙也矣。予故喜而爲序其事。復爲之歌。俾祀神焉。其詞曰。青山兮幽幽。綠蘿含煙兮樹木稠。望夫君兮悵悠悠。巖阿寂寥兮使我心愁。雷爲車兮雲爲馬。輕霞動兮江色赭。神之來兮風振野。吹竹兮彈絲。女巫舞兮紛陸離。奠芳醴兮薦潔粢。留靈脩兮牢純禱。驅魃兮逐狼虎。弭毒沴兮時暘雨。禾麻成兮息桴鼓。物旣備兮禮無愆。和熙洽兮洞淵玄。爲城爲堡兮。式恒且堅。保佑我民兮。樂以永年。

嘉興路重修陸宣公書院碑銘

士有以一身任社稷之安危。一言迴天下之趨嚮。蓋其智足以識事機。其誠足以動人心。故能出入危邦。扶持庸君。寵之而不阿。違之而不弗懲。知有國而不知有其身。若是真可謂大臣哉。孔子稱大臣以道事君。不可則止。其或先蒙君之知。而期盡心以報効。知禍而不避。知難而不止。若唐陸宣公者。其去就雖殊。而

其授一也。孔子曰：篤信好學，守死善道。宣公以之。吾常性唐德宗，以猜防小智，行多欲之私，信讒邪如心膂，視貨賄爲性命，臨患難則姑息一施，處安佚則嫌疑百出，以致藩臣叛命，士卒離心，播遷困厄，而卒不亡。及觀唐史，稱其出居艱阻之時，謀猷參決，一出于公。又稱奉天所下詔書，雖武夫悍卒，無不流涕。多公所爲，然後知其得人，以扶持也。昔者隨有季梁，不滅于楚，衛成公有甯武子，不死于晉，無競維人，不然殆哉。況公之言，德宗不盡用也，而僅用其一，二猶足以轉危爲安，易敗爲功，使其能舉國以聽公，周宣漢光，不難繼矣。惜乎其中信用羣小而棄公也。公歿而奏議行於天下，今天下之言時務論政事者，莫不宗之。然則公之志，雖暫屈于一時，而終伸於萬世。公之言，雖不能以寤時君，而足以淑後人，則亦可以無憾矣。夫公浙西之嘉興人，嘉興郡學舊有公祠，其詳見于呂公祖謙之記。而郡城之東，鴛鴦湖上，又有宣公書院，其地有橋曰宣公橋，故老相傳宣公實生于此，故於此立祠以祀公。至宋景定癸亥，始以祠堂爲書院。丙子之歲，書院延燎于兵，而公像故存。衆白郡迎置于太初堂，因以堂爲書院。大德九年，濟南趙魯爲山長，病其簡陋，始改作之。其詳見于牟公巖之記。自是城東故址，遂廢爲墟。泰定中有僧賄學官，請佃而建庵焉。後至元二年，庵災，地復于書院。是歲六月，其僧復賄有司，剋庵如故。山長雖爭之，弗能得也。至十四年，宣徽院判海岱劉公貞受命爲嘉興路總管，至則首治學校之闕，顧書院陋且朽，欲新之，而址隘弗稱，乃用推官方君道鑿言，命所司督其僧撤庵歸地，復建書院，其中爲先聖廟，兩廡，儀門，東西禮亭，靈星之門，具其西爲宣公祠，祠西爲室，東鄉以祀郡之先賢，其外爲三門，廟東爲講堂，其前軒仍舊，扁曰仁義之堂，以藏宣公奏議，謂其言無非仁義也。西齋以延師教弟子，又增買蕩地若干畝，以益廩膳，庖廚倉溷。

各得其所。將成而公改除海道萬戶。於是以屬之方君。方君力贊成之。經始于至正十四年四月。竣事于十五年二月。董其役者嘉興縣丞善慶路吏施淵。顯選及前山長王玘。任奔走者直學張惟仁。學吏沈篤也。既成使請記于劉基。惟孔子明王道以教萬世。宣公學孔子者也。故其術業一本王道。昔人以宣公祠爲書院。有以也夫。劉公用方君言。撤浮屠以復書院。可謂能排異端植正道者。有功於世教矣。於是乎序而銘之曰。孔子大聖。不遇于時。既沒之後。爲萬世師。宣公大賢。忠而見疑。降及異代。人以爲規。有德無位。用無所施。用而弗信。惟禍之隨。詭遇有獲。君子弗爲。身黜道光。雖止不墮。郡守孔良。百廢咸支。爰崇其宮。又嚴乃祠。俾民觀者。式是令儀。勿替後人。尙永無虧。

墓誌銘

劉顯仁墓誌銘

至正八年。予初寓臨安。交友未盡識也。求士於天台陶中立。得四明劉顯仁焉。與之交。侃侃如也。時杭學教導職廢。不擇有學行。輒介有權力者。或以賄營爲之。旣弗稱。皆惶懼自退。郡因令教官。選文學之士。不奔競者。具禮往致聘。顯仁與焉。顯仁曰。吾心實不樂爲此。今郡守以禮招予。予當爲斯文一出。然不能久也。居數月。竟以父病辭去。明年乃以詩經領鄉貢。弗偶于春官。歸侍父。館海寧州賈希賢之義塾。明年七月。得暍疾。疾二十日卒。且卒無他言。惟以父老。弗克養爲恨。顯仁名子青。家世居四明之黃甘里。曾祖諱三聘。祖諱圖南。仕宋爲祕書校勘官。父名景元。讀書作文爲鄉先生。母舒氏。娶史氏。無子。先顯仁五年卒。

顯仁既卒。乃以鄉貢進士除書院山長。顯仁生於某年某月某日。卒於某年某月某日。有詩文若干篇。顯仁家甚貧。而性耿介。寡所與交。其平生之最相知者。陶凱中立。賈執中。希賢。及基。是爲銘。銘曰。行成而不詭。學成而不及仕。猶有老父。而無弱子。嗚呼其死。自古有此命也。匪咎。

海寧應和卿墓誌銘

四明劉顯仁病篤。遺言于其叔父景儀。以其友人應和卿之墓。俾求銘于劉基曰。先生知予心。信予言。且無妄許可於人。其爲言必當垂於後。應君長者。生與予交。沒。予不得誌。必屬之先生。先生當不我遺。以不朽我友。我其無憾矣。夫。明日顯仁卒。景儀來致其言。嗚呼。以顯仁之才之德。予方期其用于世。以澤夫人。乃弗克遂。以死。痛何如哉。尙忍銘其友之墓。雖然。不可辭也。遂涕泣而銘之。謹按君姓應氏。聞禮其名。而和卿其字也。應與邗晉同本。於周武王之穆。後因國爲氏。有二璉者。以文章名于漢魏。君之所自出也。今杭之屬州曰海寧。鄉曰長平。里曰黃崗。君之所居也。曾祖某。祖某。父某。君之世也。鄔氏。君之母也。沈氏。君之妻也。曰元亨。文彬。元善。君之子也。妙靖。適郭某。君之女也。曰擇。曰某某。君之孫也。幼失母氏。育于祖母周。以成人。君之命于天也。勤于田。儉于家。孝于親。睦于鄰。不角勢以陵人。君之脩于身也。故宋咸淳甲戌二月二十有二日。君生之辰也。有元至正辛卯五月四日。君卒之日也。四百六十有五甲子。君之壽也。海寧州長平里之草營岡。君之墓也。至正辛卯某月某日。葬之日也。銘之者。栝蒼劉基也。銘曰。彼夸之頤。聲騰毀隨。此逐之足。視忽趾觸。弗逐弗夸。孰或予加。不夭其全。夫復何嗟。

紫虛觀道士吳梅澗墓誌銘

栝有高士吳先生諱自福字梅澗。舊爲吳興人。其先評事公感。因仕家于栝。其子孫遂爲栝人。五世祖安國。故宋釋褐第二人。歷官至太常少卿。使金國不屈節。高祖挺承節郎。安撫使司將領。復使金國。曾祖嗣英。迪功郎。祖有光。父良之。皆不仕。先生生而敏慧。好清淨。不從羣兒嬉。父母甚器異之。謂其有仙風道骨。稍長。遂命入紫虛觀。從葉邦彥先生爲道士。讀道德黃庭。咸通其大旨。及長。德行愈著。自達官貴人。以至于市里細民。無不敬愛。天師正一真人聞其名。授號崇德清脩凝妙法師。玄教宗師。亦畀號教門高士。金闕紫衣主領觀事。先是觀燬于兵。繼作極草率。及先生領事。乃重脩三清殿。建藏室。新作山門。旣成。復建通明寶閣。以祇奉昊天上帝。其下爲演法堂。於是觀宇粲新。山水爲之增氣。先生之力也。先生性孝友。能愛人。觀去其居半舍。二親在時。必日親覲省。奉甘旨。不匱親沒。喪葬皆如禮。與其兄相游處。每眷眷不忍舍。二弟早死。則撫育其孤。周恤其空乏。無少間。其兄之二子。能讀書。則蚤夜勉之曰。吾家世簪纓。更值時變。門戶寢衰。吾已委身方外。不復能力學。以續先緒。其責實在女。女惟不懈。尙克遂吾願。旣而世昌中乙亥鄉貢。世德中丁亥乙榜。如先生志焉。先生又自名其室曰知止。客至輒邀坐。具酒食。不極歡不已。同門陳樵隱老病。先生躬爲奉湯藥。侍寢興。數歲猶一日。及卒。爲治喪。盡曲盡其情。凡其他所爲。大槩類此。故領袖教門。垂五十年。大小咸敬服。無間言。至正十五年冬十月丙申卒。年七十有五。弟子王君采。先生二年卒。於是君采之弟子梁惟適。及惟適之弟子王有大。相與奉柩。葬于觀之南岡。是歲十有一月丁亥日也。基年未弱冠時。讀書栝城中。聞紫虛山水之嘉。因從數朋友往游之。先生卽束帶出。與偕游。過一所。必指曰。此某所。此舊爲某所。今爲某。作於某人。實某時。無不誠。且悉游畢。登肴速觴。主僕皆酣飲。乃

送至溪澗。無毫忽怠慢意。基後每與客往。先生輒相待如初。蓋是時鄉里之稱仁德長者。莫不曰吳先生焉。丙子之歲。基嘗游他方。不獲復見先生。今年春歸。而先生已矣。不亦傷哉。於是葬已七月。而惟適持世昌狀來請銘。基既蒙先生知。弗敢辭。乃爲之銘。銘曰。

惟吳之先自周出。弟兄來東開邑國。支分蔓延綿厥。長沙保民有功績。河南治平爲第一。前有季英後處默。安棲蒿菜食冰蘖。聲華章章在文籍。賢良代生莫具述。豫章真人純孝德。以扇渡水神輔翼。公然飛升當白日。於休先生發往蹟。保合至真去污濁。收藏精神歸閭寂。金蛇守門造皇極。二六益一靈降質。龍離于羊牝馬逸。大衍之半返冲漠。好溪南陵高以蔚。少微四星光景接。其上有松下有栢。中有佳城錮以石。地久天長保玄宅。

吳孟思墓誌銘

至正十五年春三月。濮陽吳孟思卒。其冬十有一月。翰林待制致仕申屠公。以子昭來泣拜于劉基。已公乃代之言曰。昭之先人。以文學出入縉紳間。縉紳之士揚名當世者。無不與交游。先生所知也。今死而家無貲。不能求名于大官。請以屬先生。基居杭時。嘗與孟思游而善。故不能讓。而誌之曰。君諱叡。字孟思。先世家濮陽。譜亡莫詳其系。六世祖忠。仕宋爲殿前司統制官。靖康之難。從高宗南渡江。始居杭州。高祖允昌。宋左武大夫。忠州防禦使。曾祖佐。承信郎。御前東庫使。祖清。成忠郎。殿前都指揮使。父壇。以京官子弟。恩授迪功郎。至元十三年宋亡。幼主歸命。凡趙氏及其臣僚之子姪。咸北覲京師。迪功與焉。留十餘年。復歸于杭。配王氏。生子三人。孟思其長也。孟思少好學。工翰墨。尤精篆隸。凡歷代古文款識制度。無不考究。

得其要妙。下筆初若不經意。而動合槩度。識者謂吳子行先生。趙文敏公。不能過也。故四方來求書者。日衆。出輒爲好事者邀止。止或彌年月。去則隨所至。肩足摩躡。孟思悉應接不倦。孟思事父母甚孝。母王氏先卒。越二十有六年。而父卒。年八十有九。家無恒產。而喪葬咸得盡禮。二弟皆仰給孟思。孟思又好賓客。樂周急。故金帛日至。而籩常無儲。是歲。以疾卒于崑山州之寓舍。年五十有八。歸葬于湖州武康縣之封禺山。從先域也。配徐氏。先二十有四年卒。至是而合葬焉。子一人。卽昭也。孟思爲人。外不與物忤。而內甚剛介。所交多達官。而略無求薦進意。自號曰雲濤散人。所著述有雲濤萃藁。說文續釋。集古印譜。傳于世。銘曰。孰成其名。而不侈其齡。維蒙弗冥。以鑠厥貞。有悠曷徵。昭以斯銘。

王子明墓誌銘

君諱坦。字子明。姓王氏。其先會稽人。由會稽徙括之麗水。曰玉溪。居焉。故遂爲括人。曾祖森。祖祀。父傑。皆隱不仕。守分務本。以致蕃裕。君貌峻整。而心坦夷。善居室。州閭族人無不敬信。能與人交。時賢大夫如胡公汲仲。趙公子昂。李公仲賓。皆相好。讀書務知大義。常曰。士生不獲罪於親戚鄉黨。使得自娛于一丘一壑。足矣。寵榮權利。非吾願也。至正十五年九月日。以疾卒。年五十有九。且卒。命其子曰。我家世儒者。我死。女當以時歛葬。我毋越禮。毋用釋道士。以違聖人教。且誣辱我。配劉氏。先四年卒。年五十有七。以某年某月日。合葬于戴村先塋之側。子二人。長曰琬。其次曰瑾。瑾早死。君卒之明年。君之從弟燠。以琬來。泣拜于劉墓。請銘其墓。且曰。吾兄有才學。宜用世澤物。乃闕不顯。斯爲可憾。基曰不然。洪範稱人之福有五。民鮮

能兼也。今君年六十不滯一，不爲夭，有田宅以足衣食，不爲貧，守己而不惡於人，不爲無德，世治而生，世亂而死，生不見戈兵，而死在正寢，不爲不幸，夫何憾，乃爲之銘曰：生不勞其形，而以善名，死不離于否，克全弗毀，誰如其祉，以覃孫子。

處州路教授吳府君夫人梁氏墓誌銘

夫人姓梁氏，處州麗水縣人也。五世祖汝嘉，宋建炎初，知常州武進縣，高宗南渡，至常，官吏皆散走，公獨不去，由是見知，升通判州事，累遷戶部侍郎，言金人難與和親，及東京留守孟庾不可任用，忤用事臣意，進權戶部尚書，而諷言者彈之，未幾，金果背約，孟庾以東京降，如其言，終寶文閣學士，右通議大夫，致仕，追贈少師，爵縉雲郡公，曾祖濤，宋朝奉郎通判平江府事，祖梓，父榮國，好學有文，值世變不仕，母蔣氏，宋文林郎，常德府龍陽縣丞，所之女也，夫人年二十八，嫁爲今將仕郎處州路教授吳君虎孫妻，吳君先卒，卒後二十年，是爲至正九年，而夫人以其年九月壬戌卒，年八十，十月己酉，祔葬于教授君之墓，墓在青田縣鳴鶴鄉之擇山，子男二人，長士弘，次士毅，士毅早卒，女二人，長亦早卒，次適葉訛，孫男三人，支生、本生、棣生，女二人，夫人能讀書，每暇日必召子孫立堂下，講經史大義，聲塵不倦，故其子若孫皆讀書爲儒者，銘曰：

維梁之先，因國爲姓，叔魚師孔，侯封千乘，統守九江，竦著七序，政既可稱，言亦有緒，伯鷺清節，文貞純孝，賢良代生，可則可效，侃侃夫人，少師之孫，載其靜壹，以配儒門，儒門有秩，淑人是宜，兢兢婦道，媿媿母儀，孝慈旣脩，壽考以寧，詩書之訓，子孫是承，擇山之原，其土孔阜，旣妥厥靈，必大乃後。

陳處士墓誌銘

處士姓陳氏。名莘。字希尹。世爲處州麗水縣之來儀鄉人。曾祖某。祖某。父某。皆守分樂善。以繼承其家業。故世以德稱于州里。至處士而家益裕。行益謹。推餘濟急。雖數不吝。邑舊有通濟堰。溉四鄉民田。幾二千頃。遇旱勞壅泄。必先出已資倡事。皇慶癸丑。水壞堤數十丈。鄉人大戚。處士竭力冒寒暑董役。三年乃完。蓋未嘗矜其勞焉。至順庚午某月某日卒。年六十有一。其卒之日。又其生之日也。娶葉氏。後十有五年卒。年七十有一。至正癸巳四月丙辰。合葬于其鄉吳院之原。子男四人。女一人。孫男九人。曾孫男十人。可謂昌盛蕃衍有後也已。銘曰。

旣羸旣寧。胡爲乎公。卿位不酬。其履多。而孫子克緝。乃社。垂于萬祀。

陳司戶墓誌銘

故宋平江府司戶參軍陳公。以有元至元三十一年二月癸亥卒。葬于麗水縣和樂鄉太平里。曰浯溪大羨之山。至正十七年。郡人季仁壽始撫其世系行事以爲狀。而青田劉基爲之誌。及銘。其誌曰。陳氏上世居光州固始縣。唐兵部侍郎勳始遷福唐。其子孫再世仕閩。遂留爲閩人。至宋有諱敍者。幼以孝聞。人稱之曰孝童。及長。有學行。累徵不起。敍生岳州。教授報報生湖南運使禾。累贈金紫光祿大夫。位特進。公高祖也。是始居龍泉。爲處州人。是生右儒林郎長沙縣丞輝。長沙生左承節郎江東總領所幹辦公事培。培生懋。官左宣教郎。兩浙西路安撫使司主管書寫機宜文字。公父也。公諱浩。一諱汶。字養浩。少孤。母夫人葉氏。親課之讀書。比長。通易春秋百家子史。知天文曆數之學。寶祐丙辰。以祖澤補將仕郎。趙葵馬光祖

交薦授錢塘尉。不就。景定辛酉。呂文德制置荊湖。辟權鄂州司理。咸淳辛未。陳仲微薦除紹興文學官。俱不就。後四年甲戌。銓授迪功郎。平江府司戶參軍。時潛說友安撫浙西。彊起之。未幾。以印氏殺人。事忤。賈丞相。遂解歸鄉里。卒年五十。有一夫人潘氏。葉夫人。後司戶十六年卒。而夫人奉養克盡。孝道。子男四人。長椿。從仕郎。汀州路總管府知事。次梓卿。次相卿。出爲叔父後。次松卿。早世。女二人。長適將仕郎廣東道肅政廉訪司照磨潘弼。孫男二人。巽。杭州路豐衍倉大使。熾。處州路醫學錄。曾孫男四人。女三人。其銘曰。昔周大姬女。胡公祀虞。侯封于陳。宛丘是都。其後子孫爲齊楚大夫。因國立氏。實蕃實膚。閱秦漢魏。晉宋齊。以祖勳庸德言。代有不虛。霸先開梁。王子南隅。涉隋唐宋。支分蔓敷。有自光徒閩。來宅括區。踵屬班聯。爲卿爲儒。歷世滿五。是維司戶。未及成人。而失所怙。服膺母訓。不憚勤苦。博貫經史。蜚聲庠序。而弗競。弗求。篤信好古。薦辟數不就。不違母所。參軍小試。匪溺簪組。不悖法以附勢。權臣是忤。拂衣長辭。歸臥鄉土。遂自龍泉。移家城府。韜光履素。和樂詡詡。鄰有赤子。貧弗能舉。我呼俾鞠之。卒續厥緒。里有慕廬。爲強暴奪取。我資俾直之。爰復乃宇。姻巨室。乏嗣。請後勿與。曰。鬼不歆異姓。敢餒而祖父。惟歿先厥母。痛摧肝腑。幸有子有孫。克承克敘。俾母壽以康。如子與處。浯溪之旁。其原廡廡。其兆孔安。其澤孔溥。立石鐫銘。百世猶覩。

處州分元帥府同知副都元帥石末公德政碑頌

至正十六年春季春月九日。予自杭歸至處。處父老率其子弟。遮道言。分元帥府同知副都元帥石末公政德曰。往微公。吾聚已爲墟。今微公。吾屬已爲菹。生我者天。而活我者公。君其知乎。予曰。然。如父老言。夏五

月豪酋既來納款。父老又率其子弟造于庭。言曰。石末公。邦家之干城。庶民之父母也。父母鞠子。罔不殫厥誠。厥子雖冥。亦鮮不念覆育。恩由中。惟公有大造于我州。肆我民誕軫恤于心。曰。曷以報公。願繪公像于祠。且勒石紀公功。用示于州人。子子孫孫。俾勿忘。請爲之文。予謝弗能。父老進曰。君以丞相命。布宣天子德威。既協于遠人。旌庸錄勳。當不憚爲石末公。惠安我民。不伐不矜。君實知之。鑒于庶言。式克有徵。達丞相心。以勸後人。時惟至公。予弗敢辭。乃敍其實。而繼以文。謹按公姓石末氏。名某。舊爲契丹人。其先御史大夫。以黑軍助太祖皇帝。開國滅金。爲大勳臣。有傳在史官。四世祖昭毅大將軍。事世祖皇帝。受命南伐。克襄樊。有功。定爵三品。爲沿海萬戶。佩虎符。鎮處夔。由是居江南。好讀書。工文章。元統中。襲爵鎮守處州。大得軍民心。居數歲。以爵讓于弟。而退處天台山中。至正十二年。福建妖賊入處之龍泉。處夔大震。憲司趣起公。領征討事。公至龍泉。募鄉兵擊賊走之。未幾。賊復入慶元。公進屯查田。使人購其徒爲應。賊遂撓敗。公乘勝掩擊。俘斬千計。遂復慶元。進攻建寧之松溪。政和皆克之。處州平。公乃還歸天台。十四年。海賊復叛。行省憲司。又以副元帥起公。分府台州。公辭不得已。乃命鄉民作保伍。團結扼要害。使賊不敢輒登岸。乃聚糧訓兵。以圖進討。其夏六月。朝廷用舊議。立巡海道官。所以防賊。賊乃復請降。帥其屬往衛漕運。至京師。而妖人黃草堂。復扇動黃岩民。以報讎爲名。聚衆搆亂。公以計收其渠酋六人。斬之餘黨。皆散爲民。台州平。行省又檄公分府處州。時處之屬縣。皆有賊。松陽遂昌。在上游。去郡最近。冬十月。公帥師進討。至寶定。而黃壇賊大出。焚民居。火照山谷。公分兵守寶定。自將麾下還城。而賊已薄河津。欲渡。先是沿海軍。悉發往江東。城中留者。不滿數百人。又太半老弱。公夜部分居民丁壯。出拒戰。斬不用命者三人。

衆乃齊奮。賊止不敢渡。時沿海軍有自江東逃歸者六十餘人。公召謂曰。女輩能破賊。吾當原女罪。皆拜曰。諾。卽遣渡水擊賊。賊敗走。明日退去。處州舊有城。後壞不脩。遺址蕪沒。無捍蔽。故百姓尤恟懼。會縉雲人又叛從賊。焚婺之永康。及台之仙居。於是處州四面戒嚴。乃議浚湟築城。而官倉庫盡空。晝夜經畫。勸商賈大家和集。其小民俾效力輸貲。咸從無違。審勢相方。商工度材。公悉親之。官吏左右無容私焉。由是雖勞而無怨者。義兵部長吳成帥衆討縉雲賊。中途不進。乃大掠民財以歸。謀亂城中。公測知其意。卽召與計事。縛斬之。併捕其黨。則皆授兵給號。將作矣。民大驚以爲神。十有二月。公所募義士合擊松陽賊。大破之。殺其酋。餘衆乞降。松陽遂昌悉平。今予以行省檄。與公同議招輯事。比至而公處置已各得其當。因悉遵公行。於是七縣豪酋相繼納款。公之力也。人謂公生太平時。與縉紳爲文墨交游。彬彬然儒者也。及其臨遇事變。則智勇奮發。通不失機。撫循士民。則仁慈豈弟。惠無不及。可謂有用之奇才矣。觀其鎮一州。未及朞月。而功效若是。使得制方面。專且久。盜賊何足乎哉。予旣敬公德。又重父老請。於是述輿情而頌之。美旣往。以期將來也。頌曰。

維木在山。愈久彌長。維德在人。愈遠彌光。公載世勳。來鎮有方。佩符桓桓。出師洸洸。謀先鬼神。雷行電翔。鑿旗所指。百怪走藏。旣剪我棘。爰固我疆。風雨我廬。公被之裳。晨昏起居。婦拜兒躋。有聚弗睽。公賜溥將。民愚而靈。羣祝孔祥。祝公于天。錫公壽昌。如川源源。如岳嶽嶽。於千億年。悠哉勿忘。

連珠

擬連珠六十八首

蓋聞空谷來風。谷不與風期。而風自至。深山固木。山不與木約。而木自生。是故福不可徼。德盛則集。功不可幸。人歸則成。

蓋聞志大業者。必擇所任。抱大器者。必擇所投。是以梁江湖不取螻殘之水。鈞鯨鯢不適雨盈之溝。

蓋聞急雨之漲。可以決山。及其息也。得坻則止。怒馬之奔。可以超壑。及其憊也。歷坎而瘖。是以長平之威。報在鉅鹿。會稽之勝。終于姑蘇。

蓋聞身無恒守。勢窮則屈。心無定主。情急則親。是以失時之言。每多謙已。墮井之呼。不暇擇人。

蓋聞石不亂玉。惟璊玊爲能亂玉。梟不混鳳。惟鸕鷀爲能混鳳。故妖聲冶色。君子遠之必嚴。僞行辯言。聖人懲之必痛。

蓋聞鑒能照物。翳之以塵。則不可照。水能澣物。淆之以泥。則不可澣。故身明明。斯可以使人明明。政緩緩。不可以責人緩緩。

蓋聞神龍未雲。沕淵淪而無悶。凡魚得水。罌罔罟而莫知。是故聖哲識時。以遠悔吝。愚蒙競利。以冒傾危。蓋聞物無全材。適用爲可。材無棄用。擇可惟長。故一目之人。可使視準。五毒之石。可使潰瘍。是以穰苴治師。智勇貪愚。咸宜其任。公輸搆廈。棟梁枿椽。各得其良。

蓋聞神龍可象。而不能使之去水。飛黃可駕。而不能使之捕狸。是故舍人之能。而強之以其所不能。則叛。奪人之好。而遺之以其不好。則離。

蓋聞民情本質。文過則僞。人道本直。慮佚則傾。是故聖人制禮。因自然之序。哲士用智。利不息之貞。蓋聞觀形于聲。未必見形。求實于名。未必得實。是故飄風不可以調宮商。巧婦不可以爲家室。

蓋聞物有甘苦。嘗之者識。道有夷險。履之者知。是以宴安日久。詰戎兵而聽者忽忽。老成人喪。語典刑。而聞者嗤嗤。

蓋聞物無專美。用之者貴。人有異欲。諧之者從。故冠纓不可以服鹿。而韉鞿不可以馭龍。是以合抱之松。無庸於蟬人之國。若甕之繭。見棄於裸體之邦。

蓋聞千斤之象。不憚虎而憚鼠。三寸之蝸。不蠹棘而蠹松。是以制必取其所畏。防必窺其所容。故能不震而威于斧鉞。不勞而固于垣墉。

蓋聞國不自富。民足則富。君不自彊。士多則彊。故媢嫉之人庸。則士隱而君獨。掎克之吏進。則民夷而國傷。

蓋聞春原之草。拔盡復生。夏廚之蠅。驅去還集。故時未至。不可以彊爭。勢方來。不可以力戢。是以善撲火者。不迎其煙。善防水者。不當其急。

蓋聞萬物並育。不齊其用。而各有用。五氣迭運。不同其功。而皆成功。故良珠夜光。不假燄于明燭。秋華發彩。不爭榮於春風。

蓋聞魚無定止。淵深則歸。鳥無定棲。林茂則赴。故以道養賢。則四方之民。聽聲而來。以德養民。則四方之寶。望風而慕。

蓋聞剔大蠹者。木必斲。去大姦者。國必傷。是故剖腹滌腸。不如無病。決蹠解腕。不若豫防。蓋聞日月勞其軀。而寒暑成。君相勞其心。而天地位。是故宵衣旰食。大舜所以致其憂。手胼足胝。神禹所以忘其貴。

蓋聞仁暴殊途。非暴無以爲仁之啓。怨恩異路。非怨無以爲恩之資。是以赤日流金。嘉樹之陰穆若。玄冰裂石。春陽之德煦如。

蓋聞制萬變者。在乎專。察萬微者。在乎定。故衆輻寄身于一轂。而衆物納形于一鏡。是以人心無貳。而鬼神不違。王言如綸。而兆民悉聽。

蓋聞勢有所格。則小柔可以服大力。形有所格。則大猛不能破小堅。是故食人之虎。不能吞一蠅。牽羊之綆。可以御九隄。蓋聞太陽未升。燭火與流螢並照。繁霜未降。薜花與小草同妍。是以蛟蜃之市。不可以稱有國。稊稗之秋。不可以言有年。

蓋聞冬華之木。春不必實。早慧之子。年不必壽。故良工鑄金。忌其踴冶。智士懷材。貴乎藏秀。蓋聞植善傾惡。天道之定。好安惡危。人性之常。是以順天之道。則人歸。而王逆人之性。則天怒而亡。故伐罪弔民。而周祚延于孫子。興舊樹怨。而秦禍發于蕭牆。

蓋聞拂雲之松。生于一豆之實。聳壑之魚。穿于一絲之溜。是以忽細事者。禍必盈。輕小敵者。亡必驟。蓋聞善賈者。不壅其貨。善治者。不壅其民。故政壅則奸生于國。氣壅則瘍生于身。是以山澤不壅。而雨暘時若。天地不壅。而人物皆春。

蓋聞大明普照。黜鼠惡其眯目。毒霧揚氛。蝮蛇喜其得時。是以堯舜至仁。而三苗不服。桀紂極惡。而多罪皆歸。

蓋聞執駭馬者。不與並逐。救危舟者。不與同誼。是故止鬪而平其氣。則爭可息。聽訟而平其心。則事不寃。蓋聞剪紙爲墻。不可止暴。搏沙爲餅。不可療飢。故灼灼之言。終非實惠。僕僕之拜。徒爾多儀。

蓋聞時有未至。非力所及。情有未孚。非言可親。是以見疑之璞。三獻而取刖足。不鳴之鳥。三年而後驚人。蓋聞人非大聖。鮮有全材。君欲任賢。當如用器。惟能避短而庸長。乃克奏功而濟事。是故驂騑駟以之運磨。不若蹇驢之能。干將莫耶。以之刈草。不若鈎鎌之利。

蓋聞俗有厚薄。運有廢興。故去僞就真者。盛之兆。捨實徇華者。衰之徵。是以豔舞妖歌。末世所好。奇技淫巧。先王所懲。

蓋聞理亂絲者。必凝其志。治亂國者。在定其趨。是故三軍一心。劍閣可以攻拔。四馬齊足。孟門可以長驅。蓋聞能盈而不能謙者。雖成必隳。知進而不知止者。雖得必失。是故附羸以升高。而枯蠅以任重。而躓。

蓋聞百塵之市。不畜噬犬。八家之井。不畜觝牛。是故士有悍婦。則良友不至。國有妬臣。則賢士不留。

蓋聞蛭螻之藪。神龍不棲。蒿荻之區。嘉穀不植。故秦庭虎視。而芝歌逸響于商山。周嶧鳥鳴。而紫氣流光于西極。

蓋聞物有準。則心爲權衡。非定靜之有素。必紛拏而起爭。是故坐舟視星。當察其曷轉。執斗較斛。當審其孰平。

蓋聞奔馬之輪。拳石礙之而格。迅川之水。束草投之則凝。是以一星見變。能使九服同災。一脈爽和。能使百體俱病。

蓋聞淵之深者。流必緩。聲之大者。響必悠。是故政以漸成。則民不駭。俗以漸變。則功不偷。

蓋聞植嘉穀。必以糞壤。鑄洪鍾。必以土型。故物無必賤。而賤不可輕。是以海納污。然後成其大。君納衆。然後保其榮。

蓋聞大器非一人之私。大事非獨力所建。是故利不及衆。所以起天下之爭。爵不求賢。所以萃天下之怨。蓋聞心有所憂。當徹於事。事有所害。當慎於爲。故愚人畏病而常病。智士防危而不危。

蓋聞驕者譎之招。故譎集。而賢路塞。暴者貪之使。故暴用。而怨府開。是以榮夷操軸。而若神之嚴。棄社稷。以如莽。來革乘權。而如熾之室。與珠玉以同灰。

蓋聞明鏡照膽。不啓隴廉之顏。長劍柱頤。不稱侶僂之服。是以狂歌之士。遺世若草萊。茹芝之老。比身如鴻鵠。

蓋聞嗜有所專。則姦從而入。長有所屬。則惑由之生。故徇功利者。不虞譎詐。溺鬼神者。獨覺形聲。

蓋聞暴於物者。衆志之所誅。妨於衆者。輿情之所疾。是以虎狼墮。仁者見之而不憐。枳棘當道。行者過之而必詰。

蓋聞截牛之角。而呼爲豕。則雖庸必駭。染鷺之毛。而指爲鴉。則雖愚必疑。故欺心之言。祇足以招天下之恠。掩耳之噪。適足以致天下之嗤。

蓋聞甘雨所祈不起斷根之木。長風烈烈難行折舵之舟。故涓濱星殞。孔明力殫于興漢。洛都鼎震。蓋弘志屈于扶周。

蓋聞天不掩賢而神人之道不賤。君不忌言則上下之情無蔽。是故周史陳詩而八百其年。秦令禁語而一二其世。

蓋聞天下有道則貴者勞而賤者佚。天下無道則貴者佚而賤者勞。是以弼亮惟寅而萬姓協睦。姻婭無仕而四方釋騷。

蓋聞無輿馬者不耻徒步。無魚肉者不厭菜羹。故性爲欲汨則亂。心爲物動則爭。是以絕外交則可以守淡泊。專內視則可以全淳精。

蓋聞虎之躍也必伏乃厲。鵠之舉也必拊乃高。是故學必潛心然後可以有得。藝能時習然後不爲徒勞。蓋聞龍涎螺甲以臭爲香。苦鹵酸梅用爽作味。是以五氣交感善調則收駿功。五材相成善用則獲美利。

蓋聞穴蟻不知飄風。巢鳥不知湧溜。是故閱之子患不識稼穡之艱難。山林之士患不識禮法之去就。蓋聞方石不可以爲磨。直木不可以爲輪。故至情有時而當隱。正論有時而不陳。是以明夷利貞。箕子以

之處己。危行言孫。尼父以之誨人。蓋聞大亨不以有鼎鼐。而棄釜鬻。大祭不以有犧牲。而遺鸞醢。是故馬服將趙而破秦。用許歷之言。子房

佐漢而勝楚。由董公之啓。蓋聞螻屈求伸。非終於屈。龍潛或躍。匪固于潛。是故勾踐事吳。乃成姑蘇之舉。夷吾佐霸。曷問檻車之嫌。

蓋聞陰陽之用。道妙所憑。剛柔之變。鬼神所蟄。故陽有闔而陰有開。剛可潰而柔可立。是以玄冥凜冽。而水結成冰。赤熒燔炎。而金流爲汁。

蓋聞以殺止殺。聖人之不得已。以暴易暴。悍夫之無所成。故牧野倒戈。而三軍之役不再。陰陵失路。而百戰之功盡傾。

蓋聞知風莫過於老駝。識路莫逾於老馬。是以家有老僕。則故物不委諸途。國有老臣。則舊章不求之野。蓋聞道有窮通。非智可勝。名有得喪。非力可成。故無願乎外。不必其身之絕。謗無求於物。不必其言之果行。

蓋聞譎不可恃。人覺則窮。僞不可長。情見而極。是以剪綵爲葩。不可以受風雨。畫布爲亟。不可以當戈戟。蓋聞侏儻之舌。可習而變。矇瞶之目。難滌而明。故教可行於質近。而道難化乎性成。是以御龍之智。不能訓猿以禮。神農之聖。不能服豕而耕。

蓋聞有形之器欲虛。惟虛則可以納理。無形之理欲實。惟實則可以充器。是故性無不誠。然後能主一心。心無不明。然後能應萬事。

蓋聞救天下之紛紛者。不拘細故。成天下之亶亶者。不矜小功。是故剗爛肉不爲利刃。貫髀體不爲良弓。蓋聞積倉之家。獨喜凶歲。舞法之吏。不樂清朝。故民由此困。而俗由此澆。是以去奢尙儉。明君所以弭邪。侈澄心省事。哲王所以清煩囂。

誠意伯文集卷之九

賦

述志賦

鮮余生之眇眇兮。荷后皇之深仁。具五氣以成形兮。受明命而爲人。體乾坤之粹精兮。晞日月之景光。漱飛泉之華滋兮。沍灑露之醇英。製杜蘅以爲衣兮。藉菖若之菲菲。佩琳琅之玲瓏兮。帶文藻之葳蕤。朝濯髮于蘭池兮。夕偃息乎瓊苑。願馳騫以遠遊兮。及白日之未晚。駕輕輶之將將兮。服蒼虬之駢駢。遵大路以周流兮。曳虹蜺之委蛇。挾長離而乘鸞兮。款閶闔之九門。豐隆爲余先導兮。百靈爲余駿奔。前燭陰以啓途兮。颺凱風使清埃。覲北斗于文昌兮。朝玉皇于帝臺。食玄圃之丹萸兮。澡天潢之芳津。激微焱于桂枝兮。輕波起而龍鱗。清都不可以久留兮。忽乘雲而遐征。浮江湖之浩漭兮。陵山嶽之崢嶸。野莽蒼以多榛兮。路險隘而紆曲。楔兪魚然而攫噬兮。蝮蛇蜿蜒以當陸。鬱忡忡以愴惕兮。遙皇皇以營營。雨滂滂而不止兮。霧黯黯以晝冥。烏鳶號以成羣兮。鳳孤棲而無所。楚屈原之獨醒兮。衆皆以之爲咎。欲振迅以高舉兮。無六翮以奮飛。將抑志以從俗兮。非余心之所怡。長太息以增歎兮。哀時世之異常。棄韶夏而非聽兮。登襟侏于中堂。芼軒于以和羹兮。腌鮑魚而實俎。斲榲楠以給饗兮。束荆棘而爲柱。施罽屨于丘陵兮。

怨魴鯉之弗獲。虎兕逸于山林兮。循戶庭以求索。前蒙眊以指途兮。疆楊子使操轅。命侏儒令舉鼎兮。荆都虛使守關。歲冉冉而將頽兮。日曖曖以就昧。松柏摧而根死兮。江河化而爲滄。秣余馬于不周兮。盤余轡於樊桐。無著龜以央疑兮。迷不知余所從。搏扶搖以爲輿兮。攬列缺以爲軸。騶青鸞之芟芟兮。超煙靄而上浮。梁天津以濟河兮。睇紫微之神闕。開明怒目而電視兮。貔豹吼而山裂。進無人以爲之先容兮。欲自獻而不敢。氣勃鬱以憑中兮。心惻傷以慚懷。過少微而歷明堂兮。就軒轅而陳情。雷霆碎其隱轡兮。馬辟易而不行。訪六符于泰階兮。求民極之所在。咎繇不可以作兮。競狂直以爲罪。凌天街以徑度兮。造旬始而瞻西清。衆畏讒而卷舌兮。孰能白予之忠誠。怛慄其無止兮。默悄悄以狐疑。要傳說于箕尾兮。命靈龜使占之。曰有名必有實兮。若形影之相因。相福極出自天兮。又何尤乎世之人。鼎胡峙而不烹兮。旌胡張而弗麾。弧不可以射侯兮。駟不可以策而馳。衆蠕蠕以朶頤兮。若頽波之東趨。謂蜚翟爲弗章兮。愛羸豕之負塗。方不可剗而規兮。白不可涅而黑。悲桂椒之芬芳兮。與朝菌而偕落。般比干之剖心兮。時豈不知其爲聖人。魯仲尼之過化兮。焉役役而無所容其身。由彊義而罹殃兮。惠直道而被黜。子胥忠而殞命兮。伯夷清而不食。將登山而迷路兮。欲涉水而無航。東西南北安所之兮。顧焉擇其所長。神冥冥而不下兮。龜又厭而弗告。思糾結而不抽兮。意恍惚以震悼。忽濫汜以遐舉兮。行遊目於大荒。羲和不可扳而留兮。恐年歲之弗將。駕廣漠而南征兮。叫重華于九疑。山岑岑以蔽天兮。江淼淼而不可窺。邇吾道夫西陲兮。聽鳴鳳于岐陽。慨禾黍之離離兮。梧桐摧而不生。浮龍門以泝河兮。訪夏后之遺跡。川瀆混而不分兮。鯨鯢起而人立。攬騑轡而回鶩兮。謁陶唐之舊京。無衣裳以禦寒兮。哀蟋蟀之悲鳴。心悵悵以增傷兮。神

夢夢其若醉。淚落落以交流兮。憂湛湛而來會。傳說之版築兮。無武丁其誰舉。夷吾不逢夫鮑叔兮。竟淪沒于囹圄。推竭心以服勤兮。上介山而立枯。種霸越而滅吳兮。終刎頸于屬鏹。樂毅升于金臺兮。何遁逃而走趙。周條侯之耿介兮。卒含怨以餓餒。忠有蔽而不昭兮。道有塞而不行。名不可彊而立兮。功不可期而成。李斯上書以相秦兮。空自陷於罪尤。買臣顯而僂辱兮。豈如負薪之無憂。魚赴餌以中鈎兮。雉慕媒而膺鏑。鳳凰翔于丹穴兮。又何患乎燬弋。返余旆之旖旎兮。還余車之嶙嶙。采薇蕨于山阿兮。搗芹藻于水濱。列玄泉以瑩心兮。坐素石以怡情。聆嚶鳴之悅豫兮。翫卉木之敷榮。挹清風之泠泠兮。照秋月之娟娟。登高丘以詠歌兮。聊逍遙以永年。

弔諸葛武侯賦

天地閉塞兮。聖賢隱淪。大旱焦土兮。龍無所用其神。當運命之厄窮兮。堯舜且猶有極。委厥軀以隨化兮。亦哲人之所戚。彼狂狷之縱悖兮。履羿莽以滔天。亂倫汨典兮。流毒爲淵。夏少康之不作兮。時又無湯與武。蕨薇不可以食兮。焉爨爨而獨處。睠三顧之凝悃兮。躡高光之所爲。鳳凰非梧桐不棲兮。于嗟去此其安歸。瞻星芒于渭濱兮。豈皇天之叛渙。日昃不可使再中兮。指桓靈而慨歎。昔尼父之不逢兮。寓斧鉞于春秋。誅姦邪於旣死兮。開日月之味幽。般紛紛以攘奪兮。世不以之爲殃。民彝泯滅。猶一髮兮。徵斯人其孰明。覽出師之遺表兮。涕滂滂其如雨。悲逝者之不回兮。邈英風于萬古。

弔祖豫州賦

汗池汀滯兮。蛙黽樂之。大鵬天遊兮。燕雀謂女奚爲。狐狸冠裳兮。梟獍堂宇。支離節疏兮。側身無所。嗚呼

將軍兮。管葛之倫。遭逢庸愚兮。有志莫伸。委棄九鼎兮。烹飪瓦釜。截梁爲杵兮。束椽爲柱。偃背泰山兮。依倚培塿。圭璋砥礪兮。沙礫瓊玖。山陵暴骨兮。社稷黍離。故臣酸嘶兮。行人涕洟。臥薪嘗膽兮。此維時矣。宣光不作兮。吁其悲矣。烏號之徹札兮。無養由以操之。驂騑不逢伯樂兮。與鶩駘而並馳。系曰龍嘘而雲兮。夫豈不能自翔。鴻鵠舉翮而千里兮。又何必懷此鄉。魚遊思故淵兮。鳥棲思故林。吾固知將軍之不忍兮。惜庸夫之無心。日曖曖以西傾兮。時靡靡而就逝。雁鷺羣而喋呷兮。鸞鳳反爲所制。世治亂之有數兮。天亦無如之何也。匪將軍之不能兮。惜不幸而逢此時也。死有重於泰山兮。繫生民之休戚。吾獨悲夫將軍兮。仰玄穹而太息。

弔岳將軍賦

木之顛兮。其根必傷。人之將死兮。兪扁以爲不祥。嗚呼將軍。夫何爲哉。天地易位兮。江河倒流。鳳凰天殞兮。豺狼冕旒。臣不知有其君兮。子不知其有父。嗚呼將軍兮。獨嚼冤而懷苦。讐何愛而可親兮。忠何辜而可戮。父兄且猶不顧兮。何忠良之能育。臣竭心以爲主兮。又何可以爲仇也。天之所廢。不可植兮。亦將軍之尤也。烏傷弓而欲殞兮。羣啞啞而拊翼。猿狖糜于機檻兮。羈悲鳴而不食。相伊人之有心兮。曾鳥獸之不如。忘戴天之恥兮。安峻宇而高居。信讒邪之矯枉兮。委九廟于狐狸。甘卑辭以臣妾兮。苟殘喘以娛嬉。焚舟楫于洪流兮。烹驂騑于中路。庸夫亦知其至愚兮。羗獨迷而弗寤。捐薄軀以報主兮。乃忠臣之素心。縱狂瞽之弗思兮。又何必以之爲禽。屈原貞而見逐兮。伍子忠而獲戾。固將軍之不辰兮。哀中原之蕪穢。弔孤墳于湖濱兮。見思陵之牛羊。寄遙情于悲歌兮。識忘親之不臧。

弔秦不華元帥賦

世有作忠以致怨兮。曾不知其故然。懷先生之耿介兮。遭時命之可憐。上壅蔽而不昭兮。下貪婪而不貞。權不能以自制兮。謀不能以獨成。進欲陳而無階兮。退欲往而無路。忠沉沉而不自兮。心搖搖而不固。繫乘黃服鼓車兮。驂蹇驢以曳之。冒猛虎于籠檻兮。狐狸羣而制之。衆刻木之枉直兮。信讒邪之流言。倒裳以爲衣兮。涅素以爲玄。前宕冥令指途兮。驅離婁使從之。教養由以彎弧兮。繫其肘而引之。吁嗟先生兮。何逢時之不辰。生不能遂其心兮。死又抑而不伸。姦何爲而可長兮。忠何爲而可尤。尸比干而獎惡來兮。白日爲之昧幽。重曰嗚呼哀哉。吾安歸乎。猓猓升堂兮。騶虞以爲妖。殪鳳凰而斲麒麟兮。糜梁肉以養梟。吠狗遭烹兮。捕貓蒙醢。雄雞晨鳴兮。衆以爲罪。忠固不求人知兮。於先生其何傷。國有忠而不知兮。喟皇天之不祥。辭曰。莽莽崇丘。間無人兮。天高聽遐。疏不得親兮。松柏摧折。荆棘長兮。軒于菴菴。充佩纓兮。浮雲虹蜺。紛縱橫兮。上下阻隔。幽不能明兮。嗟苦先生。卒罹殃兮。姦邪矯枉。歸罪愆兮。咎繇不作。誰與平兮。跖犬噬堯。理則然兮。麒麟豺狼。不同羣兮。自古有之。吾又何嗟兮。

伐寄生賦 并序

余山居樹羣木。嘉果駢植。人事錯迕。斤斧不修。野鳥棲息。糞其上。苗異類。日夕滋長。舊木就悴。余觀而悲之。乃募趨健腰斧。鑿升其巔。剜條剔根。聚其遺而燔之。於是老幹挺立。新莖濯如。若瘡瘍脫身。大姦去國。斧鉞之時。用大矣哉。作伐寄生賦。

天生五材兮。資土而成。汝獨何爲兮。附麗以生。疣贅蛭蠟兮。枝牽蔓繁。瘠人以肥己兮。偷以長榮。狀似小

人之竊據兮。謂城社之可憑。觀其陰不庇物。材匪中器。華不羞于几筵。實不諧於五味。來烏鳥之嘯聒。集蟲豸以刺耗。果被之而實萎。卉蒙之而本悴。壇杏無所容其芬芳。甘棠曷能成其蔽芾。亶無庸而有害。矧匪隲之可置。爾乃建脩竿。升木末。運斤生風。以翦以伐。脫纏牽於喬竦。落纖蕤之騷屑。剝蘚膚以除根。戮去毒而刮骨。於是巨蠹既夷。新莢載蕃。迎春而碧葉雲滃。望秋而碩果星繁。信知斧鉞之神用。寧能裕蠱以生患也耶。嗟夫。農植嘉穀。惡草是芟。物猶如此。人何以堪。獨不聞夫三桓競爽。魯君如寄。田氏厚施。姜陳易位。大賈入秦。柏翳以亡。園謀既售。芊化爲黃。蠹憑木以槁木。姦憑國以盜國。鬼居盲而人殞。梟寄巢而母食。堅冰戒乎履霜。羸豕防其躅躑。諒前轍之昭昭。何人心之自惑。故曰非其種者。鋤而去之。信斯言之可則。

通天臺賦 井序

昔漢武帝元封二年。作通天臺于雲陽。亦一時之奇觀也。相如已死。無能賦者。乃擬而爲之。其辭曰。惟漢五世。握乾統坤。三十有二載。文教赫乎有截。威武振乎八裔。於是乎萬方來同。四夷嚮風。靡民不寧。無神不宗。天子乃駕六龍。乘輕雷。訪王子于緱山。邀安期於東萊。泰山封兮碣石開。宣防塞兮萬福來。乃立通天之臺。臺延列仙于太虛。運巧思于孫卿。發脫卒于溫舒。景雍上之高明。得軒轅之闔丘。役六丁以屏功。鑿坤輿以承跣。下刻峭以削成兮。上辨華而紛敷。屹屹兮似不周之天柱。挺挺兮若閩風之瑤圃。蟲鴻濛以建標兮。拖甘泉以爲祛。日月縈繞於中央兮。雷霆鬱律而在下。俯太微之連珠兮。見華嶽其如馬。雲霧起于太空兮。激倒景而成虹。攀帝車而陟三階兮。平步闢道而入紫宮。建畢昂以爲梁兮。繚銀河以

爲帶覽九州于一目兮。游氛卻而清氣會。爾乃命方士集王童。脯文麟。炙輕鴻。揚太一之靈旗。撞碧玉之華鍾。萬舞波動。百神景從。奏承雲兮發咸池。獻三嬪兮矯兩龍。合六律兮齊八佾。美要妙兮靈感通。樂具九奏。神交五精。紅光下垂。燁如流星。歛霍揮忽。電掣而焱集兮。皓皜瞭皛。天輝而日晶。方象載之穆流兮。伏燭陰以承衡。蜚陳寶使先驅兮。曳旄頭以爲旌。纖阿舒徐而按節兮。飛廉游揚而不驚。於是萬姓盱眙。使者肅肅。竽籟戢音。鳥獸跼伏。風撻撻以扶輪兮。雲霏霏而蒙轂。爾乃鏗蒲牢。舉神壘。聲碎隱于穹窿兮。燎煙燼以燭漢。於是乘輿乃升竹宮。展嚴禋。老聃相禮。后夔正倫。張九光之華鐙。列羽葆以行陳。登降有數。拜起有秩。八神雍穆而順序。千官端儼其如一。精誠交孚。上下不二。祀事既虔。天瑞乃至。泰山宵呼。白雲晝媚。露落仙掌。芝生洞房。灑銅盤以如飴。擢九莖而夜光。蓬萊致如瓜之棗。玄洲獻不死之香。神筴周而復始。與天地同久長。於是天子乃颺然而思。湛然而疑。曰。予否德。曷致休徵。將天以民爲子。而王者代天以理。苟能以天心爲心。天胡爲而不喜。往者南征北伐。東狩西巡。雖曰順天以行道。能不遭衆而勞民。迺命謁者省四方。賑貧窮。察饑荒。寒者與之衣。餒者周其糧。六宮罷文繡之飾。上林閑射獵之場。老羸無負戴之勞。幼穉絕天殤之傷。亘天所覆。莫不熙熙皞皞。戴帝德於虞唐也。遂作頌曰。

於玉臺兮赫通天。不日成之黔走先。標綿綿兮稜上玄。太一睨兮輝光員。拜竹宮兮熙恪虔。蕃祉衍兮德澤宣。人神和兮皇億年。

龍虎臺賦 至順癸酉會試作

龍虎臺去京師相遠百里。在居庸關之南。右接太行之東。地勢高平如臺。背山而面水。每歲車駕行幸。

上都往還駐蹕之地。以其有龍盤虎踞之形。故名耳。

猗歟。太行之山。呀雲豁霧。結元氣而左蟠。於赫龍虎之臺。摩乾軋坤。魁羣山而獨尊。其背崔嵬突嶽。森岡巒而拱衛。其勢則昆崙駢駢。仰星辰之可捫。白虎敦圉而踞峙。蒼龍蜿蜒而屈盤。狀昂首以奮角。恍颺與而雲屯。其北望則居庸巖巖。煙光翠結。攢峰列戟。斷崖立鐵。鷲鳥飛而不度。古木樛以相掣。其下視則漲海沖瀾。飛波洗空。風帆浪舶。往來莫窮。想瀛洲之密邇。睇三山之可通。彼呼雁戲馬。適足彰其陋。而眺蟾望屋。曷足逞其雄。豈若茲臺之。不事乎版築。而靡一作勞乎土功也。想其嶽峩碣。曼衍迤邐。形高勢平。背山面水。巨靈獻其幽秘。歸邪護其光晷。何嵩華之足吞。豈岱宗之可擬。此所以通光道于上都。揭神京之外壘。匪松喬之敢登。羗乘輿之攸止也。至若四黃旣駕。鹵簿旣齊。方玉車之萬乘。蔚翠華之萋萋。載雲罕與九游。光彩絢乎虹霓。山祇執警以廣道。屏號洒雨以清埃。朝發軔于清都。夕駐蹕於斯臺。明四目以遐覽。沛仁澤於九垓。眇軒轅之梁甫。屑神禹之會稽。雄千古之盛典。又何數乎方壺與蓬萊。慨愚生之多幸。際希世之聖明。雖未獲覩斯臺之壯觀。敢不慕乎頌聲。遂作頌曰。

傑彼神臺。在京之郊。金城內阻。靈關外包。上倚天猊。下鎮地軸。大行爲臂。滄海爲腹。崇臺峨峨。虎以踞之。羣山巖巖。龍以翼之。於鑠帝德。與臺無窮。於隆神臺。與天斯同。崇臺有偉。鸞駕爰止。天子萬年。以介遐祉。

騷

九嘆九首

秋風起兮夕露溥。浮雲沉陰兮白日晝寒。木葉落兮水泉乾。孤鴈鳴兮悽以酸。攬余轡兮悵盤桓。野蕭條兮行路難。豺狼驕兮狐兔頑。蘭蕙死兮荆棘蕃。我欲奮飛兮無羽翰。援雅琴兮發哀彈。絃斷絕兮涕汎瀾。我髮種種兮颯如其稀。我心俛俛兮忽若有遺。過吾不能改兮。德吾不能知。往者不可悔兮。來者不可期。進無益于世兮。退將安歸。嗚呼已矣兮。吾寧不悲。

天有田兮不可以耕。山有龜兮不可以知咎徵。剡蒿以爲梁兮。削菌以居楹。匠石卻走兮。工垂拊膺。登高望遠兮。觀四瀛。水東流兮。日西傾。般紛紛兮。各有營。我獨展轉兮。從夜達明。

風飄飄兮揚塵。野寂寞兮無人。舟何爲兮山阿。車何爲兮水濱。北望楚兮東望秦。倒江河兮亂星辰。天門窈窕兮重九闔。願有言兮遠莫陳。虎豹颯颯兮爲喜爲瞋。橫流涕兮瞻蒼旻。心馮噫兮不能伸。麋有角兮龍有鱗。空山寂寥兮。吾誰與鄰。

江無舟兮河無梁。隰有荆棘兮而無稻粱。鷹化鳩兮雀變隼。狸爲獮兮龍爲蚓。隄長顧兮情紆軫。九疑高兮禹穴幽。梧桐枯兮鳳不留。山木慘慘兮。叫鶴鷓。鴻鵠飛兮無所投。雲沓沓兮雨悠悠。孰懷情兮知此愁。虎厭肉兮。騶虞苦飢。獺升堂兮。麒麟受羈。黃彝薦滫兮。童甫承葦。箭韶屏棄兮。絃箎兜離。指玉以爲石兮。削方以爲規。天不可問兮。神不可咨。繫彼之是兮。而此之非。有樗在林兮。有櫟在廡。蒼龜孔昭兮。勿遠余思。

今夕何夕兮。天宇清。步逍遙兮。仰觀列星。河漢皎兮。北斗橫。悲風發兮。候蟲鳴。林鳥起兮。沙鶻驚。長夜寥寥兮。何人哭聲。愴悵兮。不忍聽。回身入房兮。淚沾纓。蛟虬偃蹇兮。豺虎獐。弧無弦兮。車說其衡。知不可

慮兮。誰女令。蹇淹留兮。難爲情。

履霜思。裘兮。燠則棄之。臨河號舟兮。濟而置之。不弋胡鵠。翦薙杞梓兮。索灌葬以取木。捕貓乳鼠兮。僉以爲仁。吠狗宵警兮。行者怒。瞋彈鸞。養梟兮。莫知其咎。斲冰以承宮兮。曷云能久。長太息兮。有所思。林木動兮。巢鳥悲。山有藿兮。園有葵。心懷君兮。君不知。

秋天沈。漻兮。百草黃。蟪蛄悲吟兮。朝榮有芳。屣履起兮。獨彷徨。心悠悠兮。懷故鄉。原有粟兮。隰有禾。桂花紅兮。蘭紫芽。涼風動兮。松栢馨。流潦落兮。水泉清。蔬可茹兮。穉可酒。集鄉里兮。會親友。坐白石兮。蔭蒼筠。翫明月兮。思古人。魚鼈淵兮。狐首立。終余生兮。安所求。

秋日慘淡

秋日慘淡兮。秋風其颺。白露既下兮。繁霜繼之。藁離其根兮。葉脫其枝。丰者黧顏兮。柔者就萎。登高望遠兮。涕泗滂沱。松栢稀少兮。蒲柳何多。露不盈條兮。霜晨以晡。歲晏玄冰兮。知將奈何。

思歸引

山高高兮。可以望四荒。胡躋爾顛兮。而不見我故鄉。歲云莫兮。無衣裳。車罷馬羸兮。僕夫頓僵。水有蛟鱉兮。陸有虎狼。于嗟奈何兮。惟懷永傷。

松筠軒歌

彼松之高兮。矯吾以其操兮。此竹之節兮。耿吾以其潔兮。露溥溥兮。宵明。煙霏霏兮。曉清。風聲我琴兮。鳴鶴我笙。溜湖爲兮。我衣。塵胡爲兮。我纓。颺兮。颺兮。窈以幽。驂青鸞兮。服蒼虬。吾與元氣兮。升降。與雲霞兮。

綢繆逍遙兮相羊。終吾生兮樂以忘憂。

漁父歌

江之水兮悠悠。深有鱷鯉兮。淺有鯊與儵。檜爲楫兮。松爲舟。其釣伊緡兮。人誰女尤。江之水兮。娟娟蒹葭。吟風兮。楊柳含煙。有鮪在宥兮。有魴在淵。其釣伊絲兮。人誰女愆。江之水兮。浪浪泳之。泔泔兮。浮之洋洋。有魚與鰕兮。可釣以網。無遐爾思兮。人誰女傷。

麥舟圖歌

我馬飽粟兮。彼食不選。秕糠。我麥滿舟兮。彼無以送其死亡。我忽見兮。哀不能忘。推以與之兮。我心乃康。我聞在昔兮。有虞夏商。一夫百畝兮。家有稻與粱。生不餓殍兮。死有藏。嗚呼。今不得見兮。使我心傷。

山陰王景回友樵齋辭

稻粱離離兮。稂莠驕驕。麒不可以偶。狼兮。鳳不可以侶。梟求羊無人兮。鍾子寂寥。哀風發兮。原野蕭條。四顧彷徨兮。憂心且焦。若有人兮。在山椒。攜糧負薪兮。嘯歌以遨。黜陟無聞兮。寵辱不搖。嗚呼。吾爾翠兮。去無待子招。臨流泉兮。倚逍遙。無斤我松兮。無使栢也凋。

柳橋漁唱二首爲黃中立作

春風淡淡兮。湖水波。柳乘橋兮。青煙滿沙。扣予舷兮。發長歌。靡白蘋兮。亂鴛鴦。前有蛟兮。後有鼉。予往予還兮。吁予奈何。

彼湖有波兮。此橋有柳。我維我舟兮。聊以搔我首。放歌逍遙兮。哀莫予偶。有籀在罾兮。有沙在籊。逝者滔

滔兮。羞不可以久。綠蘋兮菲菲。落花兮點衣。江無津兮海無涯。嗚呼寂寥兮。吾誰與歸。

獲麟操

有獸維麟兮。獵者獲之。折肢毀膚兮。曾不如鹿與麋。嗚呼哀哉兮。爾何生于此時。周公已矣兮。吾能不悲。

在陳操

彼山有楊兮。彼隕有楸。彼路斯何兮。孔棘且阻。玄雲杳冥兮。不日以雨。重華寂寥兮。誰與晤語。茫茫九州兮。孰爲予所。龜蒙無人兮。駕予歸處。

白雲歌爲良上人作

用貞上人。以白雲隱居名其舍。蓋取諸唐狄公之言。以寓其思親之意。枯蒼劉基爲之歌曰。青山兮翠微。白雲兮孤飛。悵遊子兮遠于離。不如雲兮。倏往而還。白雲兮容與。青山兮欲雨。懷予親兮在雲之下。雲兮雲兮。歸予從女。

秋山圖歌

秋風起兮蕭蕭。望青山兮寂寥。水泠泠兮出石。葉槭槭兮辭條。氣悽悽兮就寒。夜耿耿兮不朝。鳳凰兮安之。梧桐兮早凋。思美人兮隔江河。玄雲冥兮天路遙。託宵夢兮遠徂征。歎扶桑兮倚消遙。盼青驪兮不來。愴怳兮魂屢飄。願乘風兮絕浮雲。要洪崖兮訪子喬。高無梯兮深無航。龜羅陸梁兮。虎豹驕。歸來兮歸來。紫芝有萐兮。黃精有苗。

梁孝子廬墓詞 井序

梁君天民。思其父母。而廬于墓。將終身焉。夫廬墓。非古禮也。然人子之情。有不能已。而自我爲之。君子不非焉。或乃狀其景物。而詠歌之。則悖於體。而非孝子之本心矣。故爲之作楚語。使梁君聞之。必愀然悲曰。他人有心。予忖度之。夫子之謂也。不其庶乎。其詞曰。

陟彼岵兮望父。陟彼屺兮望母。若儀容兮在前。恍音聲兮在後。陟彼屺兮望母。陟彼岵兮望父。惆悵惘兮無聞。心搖搖兮愁苦。聞空廬兮山之巔。朝松有嵐兮暮蘿有煙。其下維地兮其上維天。食思寢思兮以日。以年。嗚呼魂乎。其有知兮。矢相從於九泉。

送龍門子入仙華山辭 并序

龍門先生既辭辟命。將去入仙華山爲道士。而達官有邀止之者。予弱冠嬰疾。習懶不能事。嘗愛老氏清淨。亦欲作道士。未遂。聞先生之言。則大喜。因歌以速其行。先生行。吾亦從此往矣。他日道成爲列仙。無相忘也。其辭曰。

青山崔嵬兮煙雲杳冥。回溪鬱紆兮巖谷晦明。脩篁雜樹兮相蔽虧。洞壑窈窕兮人不知。清猿警夜兮鶴報晨。花開鳥啼兮長如春。隰有芷兮陵有茗。美人不來兮山寂寥。瓊芝兮玉華。丹萸兮翠葩。紫葛兮黃精。礪礪兮鬚髯。蜚梁連蜷兮登降剝爛。幽溼閭穆兮傲晃譎詭。芳蘭桂椒兮或紅或紫。松風澗泉兮金石盈耳。梧桐萋萋兮竹實蕞蕞。鳳凰翔鳴兮五色卉燦。望美人兮翠微。空山寂寥兮遲爾來歸。霓爲衣兮霞爲裳。飲沆瀣兮食瑤漿。躡正陽兮澡淪陰。精神完兮毛髮香。握六符兮躡九靈。被潘雲兮歌洞章。御扶搖兮款天門。詣北斗兮覲虛皇。超鴻濛兮軼希夷。造無始兮逍遙。嫉召秦女兮吹簫。使湘娥兮彈絃。洪崔嘯歌。

兮王母啓齒。萬舞齊進兮。襟佩颯纒。長離前驅兮。鸞鳥爲使。蒼龍駢駢兮。白虎豸豸。雷公磅礴兮。列缺旭
旭。登明堂兮。絕河津。上閣道兮。攀勾陳。過三危兮。繞玄冥。出太微兮。入西清。憩牛渚兮。泛靈槎。乘回鷗兮。
以還家。美人兮。歸來山中兮。其樂無涯。

王彥中哀辭

王氏二子者。故宋給事中信之口世孫也。長曰鍾。字彥中。次曰錡。字彥和。是同母一乳而生二子焉。及
長。俱好學。能文詞。至正癸巳。其長以春秋經魁鄉貢。次榜行省銓。授建德路學錄。未幾。以力學得疾。至
丁酉四月卒。鄉人咸痛惜之。蓋期其成。而不意止于斯也。其弟悲哭不能自勝。於是元帥石末公聞之。
爲詩以弔。且唁。而劉基爲文以哀之。其辭曰。

朝出兮。鴈行。暮歸兮。相將。聯綵服兮。上高堂。棣華茂兮。親樂康。忽秋霜兮。夏零。淒風發兮。凋紫荊。同氣兩
身兮。一死一生。車隻其輪兮。嗟何以行。窈窈兮。悵悵。想形容兮。不可尋。飲泣兮。吞聲。恐慈親兮。傷心。俯重
泉兮。永隔。掩此哀兮。何極。盡禮事生兮。恪恭子職。是謂孝友兮。死者瞑目。

誠意伯文集卷之十

古樂府

艾如張

有苑者林。衆鳥萃之。我欲張羅。榛楛翳之。旣礪我斧。又飭我徒。孰是奧穢。而不剪除。爰升于虛。以相乃麓。有條我綱。載秩我目。有鳥有鳥。五采其章。嚙嚙嗜嗜。率彼高岡。張之弗獲。憂心且傷。寤寐懷思。曷云能忘。有鳥五采。亦旣來止。昭其德音。以相君子。君子豈弟。其儀是若。艾而張矣。云胡不樂。

芳樹

蔚彼芳樹。生于蘭池。景風晝拂。榮泉夜滋。燁如其光。炫于朱曦。含華吐芬。嚶鳴滿枝。君子有酒。以遨以嬉。羽觴交橫。吹竹彈絲。相彼草木。允惟厥時。良辰易徂。能不懷思。沛其邁矣。其誰女悲。

上陵

零雨霏霏。亦降于桑。愴懷中懷。念昔先皇。惟昔先皇。創業孔艱。寤寐興懷。能不永歎。精靈安所。體魄焉依。幽明隔絕。曷已其思。堂堂梓宮。在彼高岡。霜露是萃。能不慨傷。禮起由情。將情繫物。溥斯索矣。庶其罔闕。郊社旣虔。宗廟孔威。上陵是申。式昭孝思。

將進酒

有酒湛湛亦盈于觴。酌言進之。思心洋洋。亦有兄弟在天一方。安得致之。樂以徜徉。有酒在尊。既旨且清。何以酌之。有觥其觥。豈不欲飲。惜無友生。愴悵傷懷。曷云其平。兄弟之合。如墳如篋。朋友既比。如網如維。死喪急難。是責是庇。今日有酒。如何勿思。人亦有言。解憂惟酒。載懽載嘏。亦孔之咎。我觴維瓊。我罍維玖。以樂兄弟。以宴朋友。

上之回

上之回。六龍矯捷光耀。拂鷺鳥。轡石關。匝棠梨。揚靈旗。縣月支。天馬來。宛居劔。穆上玄。釐穰穰。坐明堂。朝萬方。翕披離。玉燭光於億年。樂未央。

朱鷺

朱鷺來。玉山巔。賴翁引。縹臆延。朱鷺來。絕流赧。飲赤水。食丹砂。朱鷺來。炎德加。威昆明。滇甕訛。朱鷺來。集太液。帝錫祐。荒廣斥。朱鷺來。燁煌煌。挾鷓鴣。媒鳳凰。朱鷺來。皇之輝。神筮演。無窮期。

巫山高

巫山高哉。鬱崔嵬。下有江漢。浮天回。深林日月照不到。洞谷闔闔生風雷。危峯半出赤道上。落日猿狖鳴聲哀。虎牙赤甲鬪雄壯。風氣以之而隔闔。楚王遺跡安在哉。但見麋鹿跳蒿萊。當時忠臣放澤畔。乃與斬尚相徘徊。山中妖狐老不死。化作婦女蓮花腮。潛形譎跡託夢寐。變幻涕泪成瓊瑰。神靈震怒不可禱。雲霧慘淡昏陽臺。猛風吹雨洗不盡。假手秦矩歎飛灰。精誠感應各以類。世間妖孽匪自來。君不見。商王夢

中得良弼。傳巖之美。今安匹。巫山何事。近楚宮。終古怨恨。流無窮。

戰城南

朝戰城南門。暮戰城北郭。殺氣高衝白日昏。劍光直射旄頭落。聖人以五服。限夷夏。射獵耕織各自安。土風胡爲彼。狂不自顧。而與大國爭長雄。高帝定天下。遺此平城憂。陛下宵旰不遑食。擁旄仗鉞。臣不差。登南城。望北土。雲茫茫。土靡靡。蚩尤禡。牙雷擊鼓。舉長戟。揮天狼。休屠日逐。渾邪王。羶車尾。尾連馬羊。橐駝載金人。照耀紅日光。遙道而來歸。帝鄉。歸帝鄉。樂熙熙。際天所覆。罔不來。小臣獻凱。未央殿。陛下垂拱安無爲。

君馬黃

君馬黃。我馬驪。二馬八足爭驅馳。回頭顧影雙驕嘶。尾端散作縹虹飛。黃馬曜日黃金晶。驪馬謂是玄天精。眼前好醜那能明。吾聞良驥稱以德。不聞矜此驪黃色。世無伯樂識者誰。有德無色空自知。

思悲翁

弱齡輕日月。邁景想神仙。願往諒無及。待來徒自憐。黃金棄砂礫。劬心鍊丹鉛。鑿石不得水。沉劍徒窺淵。流光不我與。白髮盈華顛。杖策出門去。十步九不前。歸來對妻子。塵竈午未煙。干時乏計策。退畊無園田。霜蒲怨青松。逝矢恨驚弦。已矣復何道。吞聲赴黃泉。

聖人出

聖人出。臨萬方。赤若白日登扶桑。陰靈韜精星滅芒。羣氛辟易歸大荒。曠曠寒谷熙春陽。枯根發苗暢幽

藏潛魚躍波谷鳥翔花明草暖青天長。青天長。聖人壽。北斗軒轅調氣候。北辰中居環列宿。八風應律九歌奏。圓方交格神靈輳。聖人出。陽道開。億萬年。歌康哉。

釣竿

斫竹作釣竿。抽蠶作釣絲。滄洲日暖波漣漪。綠蒲茸茸柳葉垂。鈎纖餌香魚不知。石鱗激水溪毛動。玉燕迴翔竿尾重。大魚入饌腮頰紅。小魚卻放淵云中。更祝小魚知我意。長逝深潭莫貪餌。

思美人

雨欲來。風蕭蕭。披桂枝。拂陵苕。繁英隕。鮮葉飄。揚煙埃。靡招搖。激房帷。發綺綃。中髮膚。憊寂寥。思美人。隔青霄。水渺茫。山峩峩。雲中鳥。何脩脩。欲寄書。天路遙。東逝川。不可邀。芳蘭花。日夜凋。掩瑤琴。閉玉簫。魂聚衆心搖搖。望明月。歌且謠。聊逍遙。永今宵。

關山月

關山月。明風惻惻。萬里黃雲雜沙礫。夜深羌笛吹一聲。征人相看淚沾臆。古人以綏服奮武衛。耕戰守禦不外求。何人倡此戍邊策。千載以貽中國憂。關山月。圓復缺。何忍年年照離別。願得馳光照明主。莫遣邊人望鄉苦。

楚妃歎

江漢揚波六千里。上有巫山矗天起。錦衾一夕夢行雲。萬戶千門冷如水。聞道秦兵下武關。君王留連猶未還。山深不見章臺殿。汨羅冤淚空潺湲。尙憶前王好馳逐。宮中美人不食肉。回狂作哲須臾間。至今相

業歸孫叔。楚宮無復如昔人。況有神女如花新。悲來恨新還憶故。誰能斷卻巫山路。

上清詞三首

王子晉好吹笙。吹得神仙下玉京。一朝羽化隨風去。回首故宮芳草生。
天上月影悠悠。似鏡看看又似鉤。自是嫦娥甘寂寞。桂華相對度千秋。
河漢水九秋清。涼月滿空聞鴈聲。鴈聲不到夢先到。白露濕衣天未明。

漢宮曲

小雨如煙畫掩扉。捲簾忽見燕雙飛。不知春色能多少。總向昭陽柳上歸。

江上曲八首

數樹垂楊綠水邊。問郎何不繫蘭舡。浦沙新漲青山遠。半夜月明無杜鵑。
曾記樓船夜泊時。家家絃管鬪腰肢。于今絃管歸何處。綰束枯蒲當酒旗。
昨夜月明天似水。今晨月落水如天。天長水遠人何處。蘆葦蕭蕭一抹煙。
紫桂香銷五夜霜。碧雲收盡玉蟾光。琅玕不是人間樹。何處朝陽有鳳凰。
月出前山青黛寒。鴈聲遙下碧雲端。草根錯認驪珠吐。自是西風白露團。
賓鴈來時月滿洲。于今鴈去月如鉤。鴈來鴈去何時了。月照離人又白頭。
憶見垂楊綠絲。陡看秋菊映疎籬。柳花作絮隨風去。菊綻金葩欲似誰。
紅蓼丹楓一色秋。楚雲吳水共悠悠。人間萬事西風過。惟有滄江日夜流。

寒夜謠二首

良夜悠悠。星河滿天。風吹窗櫺。聲如管絃。無酒可飲。寒不能眠。枯腸飢鳴。百慮交煎。人生一世。不滿百年。寤寐懷思。曷維其然。內省不疚。有愧聖賢。

今夕何夕。歲聿其徂。草木凋落。山川縈紆。瞻彼鴻鴈。拂翼天衢。雖和鳴。載悠載徐。雖無羽翰。心與之俱。華月出雲。青鏡在隅。歌以寫懷。云何其吁。

夜夜曲

冬夜恒苦長。夏夜恒苦短。短長相蔽虧。殷勤望推挽。紉茅作繩繩。易斷汲水作池池。易旱。故鏡塵昏難遠照。故衣絮敝無新暖。西風嫋嫋吹桂枝。白露點點苔黃葉滿。

秋夜曲

木落霜露繁。烏啼夜方永。起行望明月。西風次鴈影。鴈飛一何急。烏啼安所集。徘徊不能寐。望月空佇立。佇立河漢傾。誰家砧杵聲。關山渺千里。何處不傷情。

長歌續短歌

短歌調促情苦悲。長歌引愁無絕期。短聲欲盡長聲續。似是荆山人泣玉。悲哉荆山泣玉人。但知貴玉不貴身。縱令哭盡歌堪聽。何異春花委路塵。古稱悲歌可當哭。傷心如中金石鏃。更不必聽蔡琰茄。又不必聽漸離筑。長歌飄揚徹九天。短歌嗚咽入九泉。徒言歌哭兩情異。誰知歌聲尤可憐。

牆頭花

牆頭花紅錦妬。美人抱瑟倚高樓。只恐花飛逐風去。熒熒絳蠟送殘宵。燕語鶯啼斜日暮。

望行人

朝聽乾鵲鳴。暮見燈花結。鵲鳴燈結無定期。鏡裏青雲看成雪。人生百歲難長保。天上孤鸞海中老。滔滔逝水不回西。灼灼秋花幾時好。一朝復一朝。一夕復一夕。只恐君心念妾時。妾身已作山頭石。

長松梢

長松梢青拂天。歲暮商飈急。寒苦令人憐。陰崖有樸檗。生在荆棘下。霜凋荆棘葉。網綴如簷瓦。春風破水凍。勁綠不曾赭。禍福相倚伏。豈不在所招。寧爲樸檗莖。莫作長松梢。

折楊柳

東風二月春如酒。不見百花惟見柳。柳絲綰煙留暝鴉。柳花蕩漾迷羲和。美人捲簾看不足。柳色萋萋妬娥綠。夜來微雨清郊圻。鶯黃相應鳴塤篪。欲寄柔條無信使。空將淚染回文字。

王子喬

王子喬乃是鬕王之子。皇王之孫。深宮洞房不稱意。卻駕白鶴尋軒轅。虹蜺爲旂雲爲旛。飄然乘風上崑崙。王子喬去何之。朝發陽谷暮崦嵫。六龍九鳳相追隨。穆王西上不得王母訣。胡爲元氣獨爾私。王子喬去不還。后稷功業委如山。猶有九鼎知神姦。王城日夕生菲菅。爾獨胡爲白雲間。王子喬空長歎。

走馬引

天冥冥。雲濛濛。當天白日中貫虹。壯士拔劍出門去。手提仇頭擲草中。擲草中。血漉漉。追兵夜至深谷伏。

精誠感天天心哀。太一乃遣天馬從天來。揮霍雷電揚風埃。壯士呼天馬馳橫行白晝。吏不敢窺戴天之恥。自古有必報。天地亦與相扶持。夫差徒能不忘而報越。棲於會稽又縱之。始知壯士獨無媿。魯莊糶紹何以爲人爲。

結交行

朋友以義合。久要貴不忘。結交或匪人。驕虞化爲狼。君不見市井人。盃酒忽相得。傾肝瀉膽無所惜。一朝需求不稱意。口裏驅蠶心上虺。更聞背語觸疑心。牆角車輪亦生翅。君不見耳與餘。又不見田與竇。當其得意時。刎頸以相就。寧知嫌隙反掌成。坐令衽席生戈兵。古人重結交。晏子真其人。任文執誼。羊豕之合。死生棄置安足陳。

梁甫吟

誰謂秋月明。蔽之不必一尺翳。誰謂江水清。滑之不必一斗泥。人情旦暮有翻覆。平地倏忽成山谿。君不見桓公相仲父。堅刁終亂齊。秦穆信逢孫。遂遠百里奚。赤符天子明。見萬里外。乃以薏苡爲文犀。停婚卜碑何震怒。青天白日生虹蜺。明良際會有如此。而況童角不辨粟與稊。外間皇父中豔妻。馬角突兀連牝鷄。以聰爲聾。狂作聖。顛倒衣裳行蒺藜。屈原懷沙子胥棄。魍魅叫嘯風淒淒。梁甫吟悲以悽。岐山竹實日稀少。鳳皇憔悴將安棲。

春日行

白日出東陸。垂光曜中天。大哉至陽德。蕩蕩無頗偏。坐令慘烈化滋潤。頃刻枯槁回鮮妍。聖人法天道。神

化參玄微。春朝著典禮。上下同光暉。垂衣向明物自育。帝力皞皞無人知。春天和。春日麗。但願宇宙長如春。聖明天子千萬歲。

牆上難爲趨行

弱水不可以航。石林不可以車。人生貴守分。牆上難爲趨。茫茫八極內。狹徑交通衢。紛紛皆轍迹。擾擾論鑄銖。焦原詫齊踵。龍領夸探珠。片言取卿相。盃酒興剪屠。機事一朝露。妻子化爲魚。林間有一士。蓬蒿翳窮廬。種稻十數畝。種桑八九株。有酒且飲之。無事卽安居。孰知五鼎食。聊保百年軀。悠悠身後事。汲汲復何如。

少年行

駿馬狐白裘。玉勒黃金羈。賓從如浮雲。顧盼生光輝。朝驅紫陌塵。暮醉青樓姬。但見花月好。寧知霜雪飛。往苒世途異。淒涼瑤草衰。園田皆易主。親友盡睽違。學書時旣晚。躬稼力已微。歲晏寒風生。倚牆聽隣機。逝水不可挽。枯蓬安所依。佇立爲爾歎。感我淚沾衣。

獨漉篇

獨漉復獨漉。月明江水濁。水濁迷龍魚。月明復何如。楚國皆濁。屈原獨清。行吟澤畔。哀哉不平。上山采茶。下山采麋。心在腹中。何由可白。豺狼在後。虎豹在前。四顧無人。魂飛上天。珠玉委棄。不如泥沙。躡冠戴履。萬古悲嗟。

懷懷歌

白鷗養雛時。夜夜啼達曙。如何羽翼成。各自東西去。
昨夜霜風起。入戶復吹帷。兒啼母心酸。母愁兒不知。
養兒圖養老。無兒生煩惱。臨老不見兒。不如無兒好。
食藥苦在口。食葷苦在心。苦心無人知。苦口淚沾襟。
男兒初生時。蓬矢桑弧弓。老大卻思家。懊惱無終窮。

王昭君

漢庭不賞微功士。昭君卻向胡中死。昭君辭漢入胡中。胡女悲愁漢嬾喜。含情欲怨當語誰。手彈琵琶淚沾衣。掖庭望幸從此絕。巫山有路他生歸。殷勤說與上林鴈。好在明年再相見。漢恩如海長自深。妾自生來命如線。賤妾一身何足惜。可惜當年劉敬策。遂令上策重和親。欲倚紅顏清塞塵。只恐妾身先草露。漢宮無復如花人。

塘上行

塘上何所有。有蒲與荷花。蒲花難開荷易落。使我歎恨長咨嗟。鴛鴦戲我後。鶻鵠翔我前。四顧不見人。淚下如流泉。浮萍遠遶井。寄身滄江渚。滄江不應竭。是妾命如許。朝淚灑玉臺。夕淚沾羅袂。采荷得見蓮。中復懷苦心。廣筵列肴蔬。好者即美味。茶蓼有時甘。菘葵有時棄。嚴風吹秋林。蕙蘭化爲草。於悒今可憎。芳菲故嘗好。行亦私自憐。坐亦私自憐。願爲天邊月。流影玉階前。

君子有所思

晨上龍首山。徘徊望咸京。交衢錯萬井。甲第連公卿。鞍馬相照耀。冠蓋如雲行。扈從金宮歸。賜酒銀甕盈。前庭列驕騎。後苑羅傾城。寵極妬心起。歡餘驕氣生。田寶巧相奪。蕭韓互摧傾。快意在一時。報復延戈兵。范睢掉柔舌。穰侯去彊羸。寧知幽燕客。接踵夸雄鳴。茫茫前車轍。遺跡猶未平。胡爲不自悟。坐使憂患并。二阨獨何人。千載垂令名。

上山采藤蕪

上山采藤蕪。山峻路迢遞。下山逢故夫。悲風生羅袂。憶昔結髮時。願得終百年。變故不可期。中道相棄捐。蓮實生水中。石榴生路側。未嘗掛齒牙。中心豈能識。上山采藤蕪。羅袖生芳菲。因君贈新人。莫遣秋霜霏。落葉辭故枝。不寄別條上。白日無回光。誰能不惆悵。

雙桐生空井

雙桐生空井。井空桐葉稀。葉稀不自蔽。鳳鳥將安歸。雙桐生空井。井泥泉不出。桐根日夜枯。何由伐琴瑟。

美女篇

南國有美女。粲粲玉雪顏。眉目豔華月。色暎清秋寒。紛黛不敢流。佩服惟幽蘭。一朝備選擇。得廁金宮班。真心恥自衒。望幸良獨難。況蒙衆女妬。倩笑誰爲歡。恒恐芳桂枝。寂寞零露溥。素手發瑤琴。泠泠奏孤鸞。宮商合要妙。遺響風珊珊。大音世罕識。日暮空盤桓。安得託宵夢。集君瑤臺端。相思不可極。躑躅起長歎。

玉階怨

長門燈下淚。滴作玉階苔。年年傍春雨。一上苑牆來。

秋思

梧桐生碧砌。密葉暗金井。驚心昨夜月。照見棲禽影。

長門怨

白露下玉除。風清月如練。坐看池上螢。飛入昭陽殿。

宛轉歌

星稀月白河闌干。飢蟲顛號莎草寒。美人望月歌宛轉。瀟湘水碧蒼梧遠。愁魂一夜不得歸。化作斷雲天際飛。

長相思

長相思在沅湘。九疑之山鬱蒼蒼。青天蕩蕩林木暗。落日虎嘯風飛揚。欲往從之水無航。仲尼有德而不用。孟軻竟死於齊梁。松柏摧折桂生蠹。但見荆棘如山長。長相思斷人腸。

雉子班

雉子班。飛脩脩。鳴鸞鸞。踉蹌出沒灌莽中。袞裳煥爛積瞳瞭。野人拄翳潛置媒。和聲相應無驚猜。黃間一發激流電。錦綉披裂裂委草萊。林棲野啄本無累。嗜欲沉溺禍所胎。君不見天池鳳凰食竹實。逍遙至和永終日。

朗月行

朗月何朧朧。照我綺牕中。牕中美人不能寐。起看玉宇生秋風。秋風飄飄吹木末。織雲卷盡懸明月。明月

隨風出海來。海水蕩漾龍鱗開。寒光噴浸碧落外。白浪湧作金銀臺。何處悲風怨羌管。誰家舞榭笙簧暖。長信宮中漏水長。昭陽殿裏更籌短。漏長更短總含情。開窗坐視河漢傾。廣寒宮在何處。欲往從之渺煙霧。青鵝汗漫不可期。桂華如雪東方曙。

大牆上蒿行

牆上蒿。方春擢秀何芄芄。炎天六月旱無雨。枝葉枯死隨飄風。世情翻覆不可擬。人生有身莫依倚。君不見樊將軍。一朝函首西入秦。又不見劉越石。仰天長歌握中璧。三士自殘因二桃。子胥終棄吳江濤。世人見機苦不蚤。何不看取牆上蒿。

鷄鳴曲

日將出。鷄先鳴。千門萬戶聽鷄聲。美人錦帳愁欲曙。壯士苦心煎百慮。人間百年能幾日。日日鷄鳴催日出。一朝過了。復一朝。白髮蕭蕭此生畢。齊妃播淑德。感彼蟲薨薨。周宣悟姜后。功業光中興。亦知國家共如此。莫恠鷄鳴催早起。

邯鄲才人嫁廝養卒婦

邯鄲有才人。豔色如朝霞。嫁作廝養婦。雲鬢埋泥沙。憶昔趙王全盛日。夜夜綺筵張寶琴。中山美酒盈羽觴。一笑黃金滿千鎰。繁華過眼如轉蓬。故宮禾黍秋芄芄。明珠白璧走函谷。墜簪遺珥空悲風。人生最苦是衰老。白首無歸向誰道。華門夜永月光寒。臥聽鴛鴦駘齷草。

出塞

居延風高榆葉空。狼煙夜照甘泉宮。將軍授鉞虎士怒。蚩尤亘天旗尾紅。麒麟前殿催賜酒。已覺此身非已有。猛氣遙將日逐吞。壯心肯落嫖姚後。鴈門城外沙如雪。玉帳霜濃鐵衣折。長劍須披瀚海雲。哀笳莫怨天邊月。北風烈烈刁斗鳴。回看北斗南方明。驚箭離弦車在坂。不勒燕然終不返。

入塞

狐裘蒙茸沙磧裏。望見玉關驚且喜。關門候吏記曾逢。白髮相看淚如水。歸來放馬咸陽原。舊遊今有幾人存。斜陽慘淡照籬落。閑看鄰翁戲子孫。

孤兒行

蓬頭駢足誰家兒。滿面塵埃雙淚垂。爺娘棄我不待老。骨肉無人但兄嫂。兩身一氣不相知。陌路茫茫向誰道。清晨采薪日入歸。殘羹冷飯難充飢。欲言問兄兄不顧。嫂是他人更奚訴。人生一世爲弟兄。同根自合同枯榮。爺娘在日曾眷戀。願兄回看死人面。

病婦行

夫妻結髮期百年。何意中路相棄捐。小兒未識死別苦。啞啞向人猶索乳。箱中探出黃金珥。付與孤兒買饜餌。不辭瞑目歸黃泥。泉下常聞兒夜啼。低聲語郎情不了。願郎早娶憐兒小。

淮南王

淮南王好神仙。澄心鍊炁守自然。收拾真一歸中圓。化爲五色黃金丸。乘風駕景飛上天。飛上天。逍遙遊。八鸞捧轂龍翼軫。虹蜺繽紛夾綵旂。上窺九陽下六幽。回頭大笑武皇帝。柏梁桂館空清秋。

蜀國弦

胡笳拍斷玄水結。湘靈曲終斑竹裂。爲君更奏蜀國弦。一彈一聲飛上天。蜀國周遭五千里。峩眉岌岌連玉壘。岷蟠出水作大江。地聿天浮戒南紀。舒爲五色朝霞暉。慘爲虎豹鳴陰霏。翁爲千嶂雲雨入。噓爲百里雷霆飛。白鹽雪消春水滿。谷鳥相呼錦城暖。巴姬倚歌漢女和。楊柳壓橋花纂纂。銅梁翠氣通青蛉。碧鷄啼落天上星。山都號風寡狐泣。杜鵑嗚咽愁幽冥。商悲羽怒聽未了。窮猿三聲巫峽曉。瞿塘噴浪翻九淵。倒瀉流泉喧木杪。樓頭仲宣羈旅客。故鄉渺渺皆塵隔。含悽更聽蜀國音。不待天明頭盡白。

昔昔鹽

楊柳正萋萋。門前碧草齊。別離如昨日。白髮滿春閨。飄花兼淚落。行雲逐望迷。綠苔凝履跡。粉汗浥書題。夢到龍沙北。魂銷馬邑西。卷簾雙燕入。開鏡一鸞啼。腸共吳江繞。眉將楚岫低。攀枝憐並蒂。窺沼妬雙棲。躍水寧無劍。通天亦有犀。那看明月夜。登樓惑馬蹄。

東飛伯勞歌

南飛鷓鴣北飛鵠。黃昏鳴鷄白日燭。珊瑚石上栽兔絲。鴛鴦獨宿枯桑枝。永夜涼蟾入羅幕。蟬翼不如秋髮薄。寒塘露蓮千葉紅。可憐寒露空隨風。

雙燕離

雙燕營巢時。雙飛復雙語。輕盈柳陌風。振迅芹塘雨。巢成近繡幃。雙宿更雙飛。爲蒙主人愛。不信有睽違。四月溫風起。榴花發紅蕊。拾蟲還哺雛。出入無停翬。五月教雛飛。繞巢舞烏衣。側避蛛絲過。斜縈柳線歸。

六月雛翼老。分飛各相保。脈脈傍珠簾。依依集蘭繚。世事有轉旋。陵谷一朝遷。昆明延劫火。甲第化歛煙。帶睡驚飛出。風沙兩相失。死生不得知。嫵婉從茲畢。回看舊主人。粉黛成灰塵。天高塵渺渺。海闊波鱗鱗。往苒朝還暮。惻惻向何處。毛凋半夜霜。淚滴三春露。露寒霜又濃。憔悴不成容。同心諒難隔。魂魄終相從。

烏棲曲

霜華着樹成秋蕊。樹頭棲烏驚夜起。起向幽閨啼數聲。閨中美人泣到明。吳宮烏啼夜已分。宮中不聞人盡聞。夜深風落茱萸子。沉沉漏斷啼烏死。

三洲曲

三洲洲上花柳春。三洲浦裏多商人。酒旗紅袖明江閣。客舫只望洲邊泊。八月風吹洲上樹。樓舫卻向江西去。紅粧送別各沾巾。驚動新來江北人。

武陵深行

武陵溪一何深。水有射工射人影。陸有丹蛇長百尋。嗟哉武谿不可臨。溪之水。深且闊。鳥不敢飛。龍不敢越。海氣連天。日月昏。茵露着人。肌肉裂。嗚呼。丈夫寧能沙場百戰死。有骨莫葬武谿水。

遠如期

遠如期。近別尙云可。遠期能不悲。憶昔辭君出門去。手種庭前松柏樹。樹今成器人未歸。洞房白髮秋霏霏。高原有梧隰有櫬。待君北邙山下。

大堤曲

大堤女兒顏如花。大堤堤上無豪家。東家女作西家婦。夫能棹舡女沽酒。春去秋來年復年。生歌死哭長相守。君不見。襄陽女兒嫁荊州。撞鐘擊鼓烹肥牛。樓舡一去無回日。紅淚空隨江水流。

明月子

朱閣綺疏瓊作戶。明月照人秋獨苦。桂花吹冷眠不成。誰家高樓絃管聲。倚樓空望別離處。唯有清光自來去。月圓正好缺復催。人生見月能幾回。

短歌行

來日苦短。去日苦長。日長不自覺。日短令人傷。君不見。望後月。又不見。霜中蕊。清光縱好。魄已虧。芳心欲動。根先死。少年不知老。可悲。衰老卻憶少年時。

長安道

長安道。送盡芳菲到枯槁。人生衰盛苦不常。何異長安道傍草。漢家將軍初拜官。門前上客車班班。一朝世衰煙燄歇。車輪無聲馬蹄絕。明年有詔封冠軍。依舊車馬來如雲。

隴頭水

隴頭水。征夫淚。征夫之淚滴隴頭。化爲水入秦川流。水流向秦川。嗚咽鳴不已。何因得天風。吹入君王耳。秋宵吟

玄蟬催秋入湘簾。芙蓉露浴胭脂淡。銅烏吻水添夜長。碧草歛愁歸寒蟄。羅帳無人五更雨。梧桐驚啼白楊語。春光爛熳不得知。霜露淒涼奈何汝。

車遙遙

車遙遙馬竭竭。不知何人始作車。長與人間載離別。回風吹起羅帳塵。低頭恨殺作車人。

陽春歌

帝車東指淑景昭。冶容冉冉生寒條。枯根相顧一時起。陽春只在霜雪裏。枝頭候禽鳴滑滑。暖煙日夜催花發。蜂喧蝶競方及時。風雨宿昔成離披。人間但見陽春好。未識春陽有枯槁。

鳴鴈行

嚶嚶鳴鴈鳴達旦。舉翼相連拂雲漢。平原漠漠生野煙。鴈飛只向江南天。江南十月多禾黍。一半輸官半供汝。明年二月歸養雛。雛成又望江南去。

獨不見

暖煙漾春林。色紫膩。雨摧紅出花蕊。蝶飛撩亂燕飛輕。嚶鳴相應俱有情。有人抱瑟上高閣。坐對粧臺彈別鶴。曲終顧影還徘徊。東風自吹羅帳開。

梅花落

種梅長江邊。歲晚花始發。東風爲愛桃與李。卻使孤芳坐銷歇。美人高樓深紫霞。捲簾一見長嘆嗟。世間有榮卽有悴。君不見海中碧樹終無花。

折楊柳

去年送君楊柳青。暖風晴日花冥冥。今日思君瑣窗綠。柳條又綴黃金粟。君心卻似條上花。隨風飄蕩不

思家。妾心已作科上稿。縱得春光爲誰好。折取長條寄遠人。人生四十無青春。

秋夜月

秋夜月。黃金波。照人哭。照人歌。人歌人哭。月長好。月缺月圓。人自老。

棗下何纂纂行

棗初作花時。纂纂臨路歧。八月棗成實。纍纍曜朝日。棗花纂纂蜂蝶翻。棗實纍纍人滿園。嚴風蕭瑟枯葉飛。蜂蝶不來人亦稀。

白苧詞二首

鏗華鍾。伐靈鼓。青娥彈絲白苧舞。文竿迎風雉振羽。長袖奮迅若雲舉。博山霧合春濛濛。玉缸搖火生長虹。翠蕩紅翻如夢中。

暖香結暝嬌青春。翠釵珠壓光照人。鳳簫十二煙霧勻。鴻驚燕嬌波龍鱗。玉觴交飛酒如沼。門外斜陽在林杪。宮中沉沉天未曉。

蛺蝶行

軟芳晞露春鮮妍。上有蛺蝶飛翩翩。暖風扶暝撲天起。翠重紅輕迷欲死。東園無花留不住。相隨又過西園去。沉沉斷夢失韓憑。卻抱霜華怨秋曙。

鈞天樂

君不見天穆之山二千仞。天帝所以觴百靈。三嬪不下兩龍去。九歌九辯歸杳冥。我忽乘雲夢輕舉。身騎

二虹臂六羽。指揮開明闢帝關。環佩泠泠曳風雨。明月照我足。倒影搖雲端。參差紫鸞笙。響震瑤臺寒。我欲聽之未敢前。空中接引皆神仙。煙揮霧霍不可測。翠葩金葉光相射。鯨鍾虎簾鏗鴻濛。撼崑崙兮般。峒揚天梓兮伐河鼓。咸池波兮析木風。遂升泰階朝玉帝。側身俯伏當瓊陛。訊曰。太極拆裂爲乾坤。紛紛枝葉皆同根。胡爲妄主水火金木土。自使激搏相熬煎。臣聞三皇前。羣物咸熙熙。衆子戴一父。皞皞無偏私。忽然元氣自蕩瀟。變換白黑分賢癡。蚩尤與黃帝。從此興戈矛。流毒萬萬古。爭奪無時休。骨肉自殘賊。帝心至仁能不憂。帝不答。臣心迷。風師咆哮虎豹怒。銀漢淘湧天鷄啼。飄輪撇捩三島過。海水盡是青玻璃。神奔鬼恠惕驚起。遺音瀟瀟猶在耳。夢耶遊耶不可知。但見愁雲漠漠橫九疑。

周小史

婉孌周小童。冶容敵花紅。鮮雲委綠髮。明星爛雙瞳。采蘭澧水湄。挾彈長陵東。擲果闕春市。卷衣嬌金宮。流盼溢華彩。言笑生芳風。常恐秋露零。瑤草成衰蓬。食桃坐翻覆。倩笑徒爲工。繁華豈不好。不知身所終。吾聞濟川楫。乃屬植鱗翁。悠悠萬世下。德業光無窮。

結襪子

昔有信陵君。乃在大梁城。親爲貴介弟。位冠諸侯卿。傾家待國士。倒屣延豪英。詣門謁朱亥。虛左上侯嬴。袖椎奪兵符。救趙蜚英聲。河外走豪鷲。宗社賴扶傾。于今不可見。寂寞傷人情。

拔蒲三首

拔蒲清川渚。水淺蒲不長。自非排風羽。莫羨凌雲翔。

拔蒲江水涸。終日不盈把。嫌殺紫鴛鴦。雙戲蒲葉下。
拔蒲復拔蒲。織作波紋簾。無處寄相思。秋風露蓮淡。

從軍五更轉

一更戍鼓鳴。市上斷人聲。風吹鴻鴈過。憶弟復思兄。
二更月上城。照見兜鍪光。側身望山川。淚落百千行。
三更悲風起。樹上烏鵲鳴。枕戈不能眠。荷戈繞城行。
四更城上寒。刁斗鳴不歇。披衣出戶視。太白光如月。
五更星斗稀。霜葉光爛爛。健兒爭先起。拂拭寶刀看。

前有尊酒行

前有尊酒芳以飴。舉杯欲飲且置之。丈夫有志可帥氣。胡爲受此麴蘖欺。禹惡旨酒。而玄德上達。桀作酒池。而南巢是蔡。商辛惡來。以白日爲夜。糟丘肉林相枕藉。瑤臺條忽成灰塵。流毒猶且遷般民。夫差醜而納施。楚國酣而放屈。姑蘇臺上麋鹿遊。鄢郢宮中狐兔出。灌夫罵坐。禍延魏其。竹林稱賢。神州羨藜。亡家破國有如此。酒有何好而嗜之。前有尊酒釀以清。酌之白日成晦冥。眼花耳熱亂言語。元氣耗斲肝膽傾。乃知酒是喪身物。衛武之戒。所以垂休聲。

公無渡河

丈夫不愛死。成仁心所安。殞身苟無故。哀哉徒自殘。水能殺人人共知。公獨茫然狂以癡。黃河渺渺無津

涯乃欲絕流而渡之。公也溺死人誰悲。世路如何險惡實多。平地倏忽滔天風波。利淫欲餌孰知其他。不見不聞縱橫網羅。固不必如公之癡。可堪以魚中之鮫。亦不必如公之狂。可禽以伏甲之觴。眼前言咲百媚出。寧知兵刃羅心腸。公無渡河河無津。箜篌一曲愁殺人。

隔谷歌

戰鼓咽悲風。弓折不可把。弟兄隔谷不相聞。咫尺人間與泉下。丈夫誓許國。殺身非所憐。兩心本一氣。何能坐相捐。登埤四顧望。慨慷肝膽裂。不見救兵來。但見繞城鐵甲光如雪。飛禽在羅罔。尙或念其飢。身爲高官馬食粟。忍見手足居重圍。相彼鴻與鴈。亦各顧匹儔。挽弓射一猿。羣猿拔箭聲啾啾。鳥獸且有情人。心獨何尤。嗚呼。田家紫荆雖微木。不忍聽君歌隔谷。

步虛詞五首

太微啓靈宇。紫殿含祥風。圓光照無外。梵炁來冲融。仙人魚鱗次。羽葆朝當中。離羅鬱蕭臺。縹緲浮太蒙。泰階平六符。文昌位三公。北斗運元化。軒轅成歲功。稽首玉陛下。逍遙樂無窮。鬱華開赤殿。結鄰炫黃文。葳蕤爛霄漢。照曜下土墳。東華蹕嚴駕。西崦泮昏氛。神行肅塵壑。象化陶醺醺。景風調塊垆。玉燭煥煙燼。冥茫密勿間。欻忽幽朗分。萬靈仰無私。九真告成勳。重陽峨寶闕。衆星拱高垣。寥寥太虛庭。巍巍無極尊。白虎伏右駢。青龍承左轅。玄武後躩踞。長離前騰鶩。黃靈正常居。萬有歸一元。希微眇稊粟。浩蕩彌乾坤。高卑各奠位。神化無窮源。步虛歸太一。精心覲樞庭。浮浮回極運。湛湛規中清。五神謹訶衛。六位肅枚寧。東溟升陽曜。西海生陰靈。

炎光熇玄室。湧醴液朱陵。駸駸羸穢除。綿綿淳粹凝。妙用無邊方。攝身遊帝青。
焚香禮玄梵。肅駕朝紫宸。游雲結華蓋。鮮飈翼飛輪。披煙上閣道。佩月攀鉤陳。
服食丹霞漿。嗽嚙甘露津。琅琅歌洞章。寂感虛皇嘯。飄飄廣莫風。舒嘯青林春。沆瀣六合外。永與無始隣。

氣出唱

今日不樂。振策遠遊。東上泰山。巍何脩脩。道逢仙人。要我同仇。蒸霞爲糧。烹玉爲羞。
玄英素蕤。光華蔓流。日觀菌萐。葩華九州。令我從之。身輕若浮。道以五鸞。翼以兩虬。
朝翔玄圃。夕止蓬丘。謁見王母。雲眉月眸。青娥三千。或舞或謳。風吹琅玕。聲如鳴球。雜花並開。莫知春秋。
洪崖先生。勸我此留。自揣凡骨。非仙者儔。七情交煎。一觸百抽。又病懣僻。無藥可瘳。
崇崇清宮。蕩無涯陬。列仙如沙。不少一漚。王母咲聽。拜謝叩頭。歸來山林。曷標曷鈎。
熙熙泰和。長樂無憂。

班婕妤

昭陽秋清月如練。笙歌嘈嘈夜開宴。長信宮中辭輦人。獨倚西風詠紈扇。
傾城自古有褒妲。紅顏失寵何須怨。泠泠玉漏掩重門。一點金釭照書卷。

神絃曲

紫桂飄香九萬里。三山地色如凝水。水妃骨冷不能眠。金簪素指敲冰絃。
泠泠玉泉滴貝闕。閨壑齧鮫泣。幽碧青瞳小髻歌。繁霜飛風起江低。昂瞳矐紫燄出海樹。天清月落空相望。

短歌行

涼風西來天氣清。雲飛水落山嶢嶢。髮膚剝削稜骨生。鮮芳菸悒成枯莖。百蟲哀號百竅鳴。凡有形色皆不平。成之孔艱壞厥輕。羈人含愁起夜行。列星滿天河漢橫。繁思攢心劇五兵。天高何由達其情。歸來託夢通精誠。

長歌行

秋夜夜長月照軒。夢見天神與我言。矚靈循環周四垣。四時迭代成寒溫。枯榮生殺相爲根。我於萬物何怨恩。生丁其時命所存。六淫洶湧無鍵關。由其弗約離其魂。春葩敷披夏實繁。外美中瘁誰能捫。風霜涸寒肅不驚。納華狀真歸本元。掃滌浮穢夫何冤。我今語女開女昏。生生殺殺無窮源。斂女旨蓄守女門。扶桑赫赫升朝暾。

燕歌行

霜飛動地燕草凋。沙飛石走天蕭條。江河倒影陵谷搖。白日慘淡晝爲宵。美人迢迢隔雲霄。青冥無梯海無橋。魚枯鴈死星芒消。沉沉思君不自憍。愁如驚風鼓春潮。歲云暮矣山寂寥。梧桐葉落空乾條。崑崙層城阻且遼。蒼梧九疑煙霧遙。瓊田瑤草芟菖蕘。江蘼澤蘭成艾蕭。登高望遠肝肺焦。安得羽翼搏長飈。

江南弄七首

江南細水細綺波。江南綵女雛鳳歌。凝嚙引睇紆青蛾。紆青蛾。舒窈窕。網軒綉戶鎖嬌春。不放杜鵑來木杪。

雄龍呼雌江底鳴。山搖谷殷江波驚。餘音不斷隨風征。隨風征。入湘竹。截玉鑽星吹向天。楚江六月無炎

燠。

湖波澄明日色鮮。畫鷁相隨出采蓮。嬌紅曼綠鬪春妍。鬪春妍。倚徘徊。今朝花盡且歸去。明日更有新花開。

河曲懸匏渭濱竹。碧鮮削出藍田玉。輕翎參差飛羽謾。飛羽謾。幽簧含。丹櫻瑤筍調清吹。月明紫鳳來銜

麩。采菱女子木蘭船。翠裙紅袖青玉鈿。搖光蕩影惜嬋娟。惜嬋娟。愁夕暉。拔蒲歌斷鯉魚入。歸去芰荷香滿衣。

江草萋萋春渺渺。江臯出遊多窈窕。輕霞衣裳碧雲嫋。碧雲嫋。紅日斜。鴛鴦飛過綠渚去。東風吹落菖蒲

花。巫山峒峒巫峽長。瑤姬出舞朝雲翔。翠葩嫋嫋金支光。金支光。丹葉艸。寶鷄爲使鳳爲驂。去雨來風樂無極。

步出夏門行

步出夏門。遙望滄海。九河茫茫。碣石安在。魚龍淺澗。日月暎藹。三山何所。弱水浼浼。羲和曷往。鼇極孰宰。發鳩之羽。其心不改。安期不死。桃實可待。悠哉沛乎。歌以永慨。

丹霞蔽日行

彤霞何煌煌。蔽此白日色。炎埃被九野。照灼后土赤。朱陵開火府。燿爛相蕩射。山蒸絳紅氣。川瀉丹砂液。

穹玄變光曜。衆草相烜赫。迴迷河林蔭。高奪昆命碧。鬱華不能神。跋烏已化魄。女媧在青天。歲莫還鍊石。

鳥生八九子

樹上鳥。一生八九子。相呼啞啞聒人耳。何不學啣泥燕。和鳴集桃李。又不學鷹與隼。奮翅高飛碧雲裏。胡爲巢此庭樹間。啄腐吞腥饜吻背。少年挾彈如流星。禍機潛發不見形。翅翎摧折身首磔。螻螳傷殘誰女惜。

猛虎行

君不見昔者牛哀病七日。化作猛虎形。躑躅衣裳。佩帶換毛尾。棄置衽席。眠茅茨。怒牙出。吻目閃電。頃刻不識妻與兒。昨日燈前相啞語。豈意今朝化爲虎。嗚呼。世上茫茫化虎人。祇應化心不化身。

行路難二首

君不見。水上澌。往來倏忽隨波移。又不見。花上蜂。東枝飄落尋西枝。世人食葵不食藥。莫倚結交心匪石。君不見。避席武安人。卽是當年竇家客。

君不見。白日光。不照幽草心。又不見。石上雲。膚寸遂成陰。世間會合良難得。況有巧言能燦金。伏波稟葬魏碑仆。當時豈是非知音。智謀啓疑忠逆耳。平地反掌生崎嶇。行路難。愁最深。

野田黃雀行

野田雀。鶯啄啄。朝食山下禾。暮食山上粟。千百爲羣。叢薄裏。忽然驚飛若蜂起。飛飛卻落稻田中。衆口齊啄。稻爲空。農夫力田望秋至。沐雨梳風盡勞瘁。王租未了私債多。況復爾輩頻經過。野田雀。鷹隼高翔不

汝輩農夫田父愁何極。

何當行

念離莫悲歌。悲歌慘於哭。思鄉莫望遠。望遠傷心目。九疑迢迢隔湘川。空山落日啼杜鵑。梧桐摧折鳳凰去。蛟蜃出沒波滔天。令我四顧心茫然。淚如懸崖瀉流泉。樊桐有路到玄圃。何當飛墮王母前。

射虎詞

長戈如林夾弓弩。言向深山射猛虎。猿兒蒙鶻走如風。所過犬羊皆爲空。紛紛散入人家宿。丁男上山婦女哭。前行聞虎心先畏。一虎當頭萬夫棄。折弓墜刃委如土。卻向人前作威武。

苦哉行

鷄不可使守門。狗不可使司晨。驅車梁弱水。日暮空悲辛。我欲乘風謁閭闔。虹蜺彌天雲霧合。九關虎豹森駭人。長跪陳辭關不荅。錯石作瑛璠。鬼神驚見欺。截梁爲構櫨。般垂拊膺淚交頤。衝風結玄冰。道惡不可履。巫咸上天去。澤凍神蒼死。我欲竟此曲。此曲多苦聲。鴻鴈向天北。因之寄遐情。

起夜來

微月就沒銀河爛。城烏啞啞夜將半。憂愁不寐攬衣起。仰看明星坐待旦。威弧歷落連天狼。兩旗欲動風不揚。槐根王侯夢未覺。豈知鷄聲堪斷腸。

長相思

長相思。妾在天南君在北。紅顏未必無人知。葑菲不羨君王食。相思迢迢隔天河。長夜不眠愁奈何。欲憑

魂夢到君所。君門九重虎豹多。長相思。向誰道。涼風日夕吹桂枝。可惜馨香暗中老。

無愁果有愁曲

君不見陳家天子春茫茫。後庭玉樹凝冷光。樓船江上走龍陣。宮中只報平安信。酒波灩灩蒸粉香。暖翠烘煙妬嬌鬢。無愁老夫貂鼠裘。降旗搖動臺城秋。生綃束縛檻車去。始信人間果有愁。

妾安所居

憶昔嫁君時。紅顏豔春華。今與君別離。明珠化爲沙。女兒嫁夫願偕老。何異青菘纏蔓草。一枝一葉俱有心。生死長當兩縈抱。誰言妾心君不知。芳蘭委棄同蒺藜。妾欲有言君不見。君車遙遙妾空戀。君家大宅荒路隅。可憐棄妾安所居。

放歌行

鴻鵠搏紫霄。鶉鳩守苞桑。豈惟異所志。羽翼有短長。玄陰變白晝。闇虛侵太陽。一鹿走中原。熊虎競騰驤。植竿成壘壁。舉袂爲攙槍。叱咤倒江河。蹴蹋摧山岡。犬牙據險要。瓜瓣割土疆。六奇誇曲逆。三略稱子房。磨牙各有伺。裂背遙相望。龍蛇未分明。智力正爭強。孔明魚得水。毛遂錐脫囊。霧晦豹始變。海激鷗乃翔。嗟爾獨何爲。抱己自摧藏。

鴈門太守行

赤符復漢祚。褒德先侯封。陽燧焰發鏃。霜隴山鳴鍾。馴雉集中牟。乳虎去弘農。抱鼓夜無聲。桑陰麥芄芴。循良一何多。謠歌滿兒童。賢哉洛陽令。卓魯相繼蹤。隨姦若明神。外猛中有容。正獄除煩苛。平賦寬畸窮。

黎民拜恩惠。吏卒服至公。身歿德不墜。絃歌祠廟崇。望美安陽亭。頑懦興廉風。彼哉肉食者。輿馬愧盲聾。
豔歌行

亭亭松柏樹。結根幽澗隈。高標拂雲日。直榦排風雷。曾經匠石顧。謂是梁棟材。明堂未構架。厚地深戕培。熒星入天闕。武庫一朝災。搜求到櫟樸。谷赤山城垓。般爾死無人。鉤繩付輿臺。路阻莫自致。棄之于草萊。天寒斧斤集。歲莫空摧頽。三光無偏照。四氣有還迴。斷喪在須臾。成長何艱哉。孰知真宰意。悵望使心哀。
門有車馬客行

門有車馬客。云是故鄉人。執手前借問。鄉語知情真。自云別故鄉。觀光京國塵。經商涉代北。薄宦往西秦。繡鳳錦鴛鴦。金鞍紫麒麟。結交貴公卿。出入擁衆賓。劇孟氣方銳。郭解家不貧。但見三春花。寧思秋露晨。斷蓬失其根。風沙歛漂淪。前途塞虎狼。故里荒荆榛。昔爲橫海鯨。今爲涸轍鱗。話言未及竟。涕淚各盈巾。居家倚骨肉。出家倚交親。何當在異縣。見此舊里鄰。園蔬如蜜甘。市酒若醴醇。悲歡且棄置。生死同苦辛。知歌有深情。情深難具陳。

煌煌京洛行

齊謳且輟唱。吳趨亦停聲。請君傾耳聽。聽我歌洛京。京洛何煌煌。卜宅自周王。五服畫九州。茲爲土中央。用文四戰地。恃德不恃強。叔世道雖微。靈源瀉流長。漢祖殪秦項。定都由于房。馬上得天下。繼周焉敢當。光武起白水。龍飛掃攬槍。應天順民心。戡暴安痍傷。冕旒王宸極。圭組崇俊良。功臣列爵土。循吏勸畊桑。詔書報臧馬。玉關閉西羌。周嚴播高風。卓魯樹甘棠。廷無乳虎伏。邑有馴雉翔。涓涓醴泉液。燁燁朱草芳。

繼體更賢能。守成不踰常。南郊尊上帝。宗祀親明堂。辟雍養耆德。靈臺觀稷祥。南宮畫元勳。東觀昭文章。詩書母后訓。淫侈蕃封防。百年天再闢。四帝日重光。傾昃自滿盈。宴安生怠荒。刑官竊威柄。義士死道旁。覺積千里草。禍成一星黃。大命始不摯。餘暉尙悠揚。典午亦有初。言治稱太康。用人混哲否。孽芽出蕭牆。兄弟相啖食。同氣成豺狼。金墉豈不固。清談漫洋洋。妖星入太極。胡雛登御床。銅駝荆棘沒。寢廟狐狸藏。落日照西城。寒雲歸北邙。轆轤無人行。伊洛廣且長。衰榮若旦暮。道德信金湯。殷勤京洛篇。厥鑒不可忘。

升天行

太儀轉神樞。日月飛兩丸。榮華如電火。瞬息無留顏。誰能與螭蛄。爭鳴秋草間。中夜集五靈。步虛款天關。擺脫塵土累。廓落真境寬。玉髓充晚食。瑤霞足晨餐。妙合五色光。化爲九轉丹。洞朗照無極。逍遙出人寰。象載六蒼虬。翼以雙紫鸞。濯足北河津。弭節蓬萊山。伶倫歌九韶。眉連舞七盤。浮丘吹參差。宓妃鳴佩環。娛樂竟日夕。還歸玉宸班。

長安有狹邪行

大道坦蕩蕩。狹路能摧車。大道少人行。狹路爭走趨。狹路險以捷。大道平而迂。所以狹路間。疊足不憚劬。噌嶮磨爲光。窻均輾成渠。峻滑無澁踵。攀緣有牽裾。駟驪踔蹄蹠。僕從頰肩呼。清霜晨入袂。白露夜沾襦。擾擾極追奔。營營競須臾。窮通乃定命。得喪豈異途。君子遵義路。詭御非吾驅。滅趾禍難悔。素履戒勿踰。那能慟阮籍。何用泣楊朱。長安有狹邪。雖捷焉所如。

飛龍引

軒轅黃帝上天時。五龍垂髻下接之。後宮綵女咸相隨。雲輕龍健不可追。綵女化作黃金芝。千年一作花。花光五色明朝霞。扶踈蔭映玉皇家。沉精降液爲丹砂。鍊丹砂。成水銀。水銀流汞浴火輪。火輪照曜十二辰。黃龍歸來天帝噴。

春思

憶昔東風入芳草。柳綠花紅看總好。今日風吹陌上塵。鶯啼燕語俱傷神。憂來感人淚沾臆。未必春光不如昔。

靜夜思

靜夜思。一思腸百轉。啼螿當戶聽不聞。明月在庭看不見。方將入海刺猛蛟。復欲度嶺邀飛獠。胸中倏忽亂憂喜。得喪紛紛竟何是。靜夜思。思無窮。天雞一聲海日紅。滿頭白髮吹秋風。

華山畿

華山畿。勞勞渚。割棄父母恩。相隨黃泉去。男婚女嫁當及時。標梅不見周南詩。王風蕩蕩散荆棘。帷薄日夕生狂癡。當歌悵然有所思。華山畿。何足悲。

冬暖行

孟冬十月暖。桃李花盛開。胡蝶草間出。飛上花枝來。蝶知愛花爲花出。不知冬暖無多日。霜風一夕花作塵。墜粉飄黃愁殺人。

節婦吟

淒切復淒切。綠萍初生池水竭。蘭根壓霜芽不茁。春風冷泠逐秋月。蓼蟲食苦甘如酒。卷施雖生心已朽。楊州青鏡蝕土花。玉匣瓊臺復何有。君不見人間日月如飛梭。地下相從應始多。

登高丘而望遠海

登高丘望遠海。長風簸浪高於山。蓬萊宮闕無光采。雲霧翳陽谷。羲和安所之。鯨鯢作隊行。鱗鱗如朱旗。精衛啣石空有心。口角流血天不知。登高丘望遠海。弱水浩蕩不可航。一望令人玄髮改。

江上曲

江上風吹沙石走。江中濤浪如牛吼。鄂君繡被寒無香。江水不如殘夜長。

北風行

城外蕭蕭北風起。城上健兒吹落耳。將軍玉帳貂鼠衣。手持酒盃看雪飛。

銅爵臺

高臺突兀連蒼穹。中有艷質如花紅。君王已作西陵土。繡帷玉座空。秋風向陵舞。罷寒月白。蒼狐夜啼松。淚滴冢中枯骨寧有知。翠袖珠袍爲誰色。當其奮臂譙許間。手揮羣雄如刈菅。橫矛賦詩逞豪傑。猛氣可以移南山。寧知暮年壯心死。遺教但聞令賣履。唏噓涕泣兒女態。遺臭至今猶未已。君不見永安宮中顧命時。天下英雄人得知。

薤露歌

蜀琴且勿彈。齊竽且莫吹。四筵並寂聽。聽我薤露詩。昨日七尺軀。今日爲死屍。親戚空滿堂。魂氣安所之。

金玉素所愛。棄捐篋笥中。佩服素所愛。淒涼掛悲風。妻妾素所愛。洒淚空房櫳。賓客素所愛。分散各西東。離者自相快。親者自相悲。有耳不復聞。有目不復窺。譬彼燭上火。一滅無光輝。譬彼空中雲。散去絕餘姿。人生無百歲。百歲復如何。誰能將兩手。挽彼東逝波。古來英雄士。俱已歸山阿。有酒且盡歡。聽我薤露歌。

沐浴子

沐髮不如清神。浴身不如洗心。仁義非外鑠。冶容防內淫。登山望漢京。樓觀蔚嶽岑。軒車擁衡禹。几杖尊雄歆。著書擬周孔。吐論躋騫參。青衿來濟濟。白日去駸駸。驅車泗水曲。攬轡長淮陰。悠悠黃石略。杳杳天風吟。盛時不可再。感歎爲沾襟。

秋閨曲

天上傷心月。秋來情更親。那能照幽獨。不照遠行人。

蓮塘曲

落日下蓮塘。輕舟赴晚涼。偶然花片落。飛出兩鴛鴦。

蒿里曲三首

澗草萋萋泉汨汨。紫蘭香老棠梨發。山中無人松柏寒。臥聽狐狸嘯明月。白楊樹頭風惻惻。寡鳥悲啼山月黑。殯宮冷落清夜長。銀鴨金甌不堪食。山花冥冥啼子規。烏銜紙錢掛花枝。山中遊人莫相咲。君到此中當自知。

促織詞

草間小蟲名促織。夜夜隔窗鳴不息。小兒側足潛聽聲。雖籠鏡柵閉爾形。金錢縱聞爭相妬。得勝轉多局轉固。高秋九月嚴霜飛。開籠卻放枯蔓歸。舊穴無蹤故帷去。生死淒涼向何處。

銜泥燕

銜泥燕尾涎涎。銜泥點污几席間。更捉飛蟲撲人面。銜泥燕人言爾巢長滿尺。主人倉廩多蓄積。借爾華屋好安居。年年壘巢生爾雛。

秋思二首

蕙草芳已歇。候蟲寒不鳴。相知惟白髮。日夜滿頭生。露出階苔光。風生庭樹冷。推窗掩明月。不忍見孤影。

寒夜曲

蟾車軋露迷圓景。金井轆轤儼素綆。孤鸞叫破海天雲。嫦娥淚滴方諸冷。十二樓開春醉醒。千年斷石生曾青。林霏散漫紫府曙。白莎黃葛空殘螢。

古鏡詞并序

金陵武生於勾曲野人得古墓中鏡。李桓先生辨其款製燕石上有元康年字。定其爲漢時物。今雖不能灼見其非晉而漢。然其來之不近。則明矣。

百鍊青銅曾照膽。千年土蝕萍花灑。想得玄宮初閉時。金精夜哭黃鳥悲。魚燈引魂開地府。夜夜晶光射幽戶。盤龍隱見自有神。神物豈肯長湮淪。願借蟾蜍騎入月。將與嫦娥照華髮。

琅琊王歌四首

駿馬須好鞍。疆弓須勁箭。將軍不知兵。健兒空自健。
香羅金縷衣。采花弄春暉。花高折不得。空步綠莎歸。
出門無情親。大道行亦窄。寄與遠遊人。屈貧勝爲客。
四通八達琅琊道。快馬如龍踏煙草。草淒淒。煙漠漠。陌頭風起桃花落。

長相思四首

長相思。在瀛州。蓬萊之山忽沉浮。弱水無風亦倒流。鯨魚一吸吞九牛。旋淵呀呷鳴其喉。青鳥飛去天悠悠。嗟我欲往徒離憂。

長相思。在蒼梧。九疑愁雲隔明都。湘神淚滴湘水枯。冥冥霧雨啼短狐。楓林沉陰天色晡。鳳皇不食鷓鴣呼。嗟我欲往空長吁。

長相思。在昆侖。黃河怒浪訇天門。天開石裂龍駿奔。羲和縣車光未暎。岷峨雲埋蜀帝魂。流沙千仞沉輻轅。嗟我欲往難窮源。

長相思。在玄冥。寒門六月天雨水。天關凍折天柱傾。女媧鍊石補未成。石鱗迸落如流星。龜蛇上訴愁帝青。嗟我欲往勞心形。

殘絲曲

玉樓十二春如綺。日暖清池躍魴鯉。空閨無處着柔情。夢逐殘絲撲天起。天南河漢天西流。豈知少年能

白頭便喚姮娥栽桂樹。花時相約月中遊。

拜新月

月生花始開。月圓花漸落。花開人少年。花落人可憐。女兒拜新月。望圓不望缺。未圓望不休。既圓應更愁。

自君之出矣

自君之出矣。雲鬢愁不綰。思君如轆轤。倏忽心百轉。

美人燒香詞

翡翠釵梁雲作葉。膩紅深暈桃花頰。玉奴纖手捲蝦鬚。繡羅襪小不勝扶。低頭背人整裙帶。神前獨自深深拜。翠袖輕迴香霧分。細語悠悠聽不聞。門外遊人空駐馬。冥冥白日西山下。

築城詞

君不見杭州無城賊直入。台州有城賊不入。重門擊柝自古來。而況四郊多警急。愚民莫可與慮始。見說築城俱不喜。一朝城成不可踰。挈家卻向城中居。寄語築城人。城高固自好。更須足食仍足兵。不然劍閣潼關且難保。獨不念至元延祐年。天下無城亦不盜。

畦桑詞

編竹爲籬更栽刺。高門大寫畦桑字。縣官要備六事忙。村村巷巷催畦桑。畦桑有增不可減。準備上司來計點。新官下馬舊官行。牌上卻改新官名。君不見。古人樹桑在牆下。五十衣帛無凍者。今日路傍桑滿畦。茅屋苦寒中夜啼。

驛官亭鼓瑟瑟打。驛使星馳買官馬。府官奔走羣吏趨。呵叱縣官如使奴。一時立限限鄉役。馬價頓增無處覓。賣田買馬來納官。買時辛苦納時難。縣官定價府官減。驂騑也作駑駘看。歸來拊膺向隅泣。門前索錢風火急。

神祠曲

路傍古廟壁半斜。雨滴香案堆坭沙。槎牙死樹當道臥。樹上紙錢猶未化。春秋祭祀知幾時。烏鴉得食號相隨。人人歡喜得好琫。低昂拜跪山花飛。寧知禍發在旦夕。空村無煙唯瓦礫。廟傍烏鴉亦不來。獨留土偶眠蒼苔。

雨雪曲

北風吹塵沙。雨雪日夜深。三足之烏毛翻飛不遠。白晝慘淡成幽陰。青天冥冥不可覩。水有罔象路有虎。平民避亂入山谷。編蓬作屋無環堵。回看故里盡荆榛。野鳥爭食聲怒噴。盜賊官軍齊劫掠。去住無所容其身。嗚呼。彼蒼何日回春陽。北風雨雪斷人腸。

苦寒行

去年苦寒猶自可。今年苦寒愁殺我。去年苦寒凍裂唇。猶有草茅堪蔽身。今年苦寒凍入髓。妻啼子哭空山裏。空山日夜望官軍。燕領虎頭聞不聞。

遠客歎雨

遠客暮年筋力寡。入門無家出無馬。冷風一夜雨瀟瀟。平明道上泥沒腰。竈下濕薪不生火。敲水取水指欲墮。僕夫怨怒呼不前。終日忍飢掩關坐。憂來傷心令髮白。人生百身莫爲客。

久別離

久別離。別時小兒未解語。今日踉蹌庭下來。向人問爺淚如雨。兒知有爺未曾識。爺有母在愁何極。明庭不奏采薇詩。久別離。當語誰。

苦熱行二首

南風吹雲不成澤。朝霞暮霞山谷赤。赤松羽人潛大荒。火府朱陵氣相射。蜚廉翹跼不能奮。萍號眼枯口流液。遠客魂銷畏絺綌。

憶昔伏波南伐時。穿岸爲宮避炎氣。青草茫茫起瘴煙。吹蟲含沙總堪畏。人生惜死非男兒。但有馬革可裹屍。武陵之曲何傷悲。

梁甫吟送鄭希道入京

老翁生長平原里。但見平原路如砥。謂言路平無嶮巇。車輪不摧馬如飛。今日驅車上梁甫。回頭卻憶平原路。梁甫吟。愁我心。

望遠行俟後舟不至作

望遠行。日日望來腸欲斷。數遍南風下水船。愁中白日偏難晚。順風順水不易得。欲去又愁來者遠。望遠行。一望令人白髮生。

女兒割股詞爲徐勉之作

女兒少小幽閨裏。深掩重簾學針指。施朱傅粉有母憐。一朝無母將焉恃。青燈背壁月當戶。暝山之禽夜啼苦。丹元訴天天爲愁。淚洒長河作飛雨。嗟兒與母同爲身。母子分離何苦辛。抽刀割股股不血。一念自感皇穹仁。吾聞孝慈出天性。人心至誠天必聽。兒股有肉母所育。母生兒死兒亦足。

巴陵女子行

巴陵女子天下奇。石作心肝冰作脾。生平見義不見已。投淚恨殺襄陽兒。臨終裂素寫怨語。生氣猶能起風雨。君不見虎符繫頸東海橋。令人愧死巴陵女。

秦女休行

秦家女兒美且都。齒如編貝唇如朱。有生不幸遭亂世。弱肉強食官無誅。兄朝出門暮不返。家人悵望空倚閭。女休聞之肝膽裂。奮臂不惜千金軀。援矛一擲白日威。仇血上濺天模糊。市人驚譟塵土沸。邏卒奔走馳金吾。有心殺人寧惜死。顧謂女吏何其愚。嫚法長姦誰所致。舍生得義吾何逋。精誠通天天爲惻。救書一夕來宸極。路旁觀者咸歎嗟。女休出門無喜色。君不見景升本初之子空。是男亡家破國令人慙。

疊中歌二首

小兒負薪早已歸。穴兒采螺底不回。海上檣竿齊入浦。山頭雲起颺風來。祝融廟前稻欲齊。椰子如瓠壓枝低。烏鴉亂叫祭鬼罷。桄榔樹裏鷓鴣啼。

閨詞六首

戎馬關山隔。空閨鬢髮華。將何寄消息。江樹總無花。
昨夜三更夢。分明見所思。覺來驚枕席。心跡兩相疑。
寒鴈南還北。江湖西復東。佳人不可見。霜雪萬山空。
剔卻燈花蕊。從教污翠鈿。幾回虛報喜。誤妾不成眠。
小小雕渠鳥。雙雙入畫樓。樓中人怨別。愛爾不知愁。
欲寄音書去。書成乏便郵。持書上樓望。淚洒鸚鵡裘。

烏啼曲

可怪烏鴉鳥。鳴聲不喜人。如何好彊聒。故博主人嗔。

五雜俎

五雜俎。原上翻。往復還。小販客。不得已。漣沲麥。
五雜俎。百衲衣。往復還。燕雙飛。不得已。賦式微。
五雜俎。市賣果。往復還。郵傳馬。不得已。死垓下。

春江曲

江上風帆日日歸。獨自狂夫音信稀。無因化作鷓鴣鳥。隨着郎舡到處飛。

公子行

玉勒金鞍照地光。駝裘珠帽繡文章。平明上馬歸來醉。他日清朝作棟梁。

仙人詞三首

玉府仙人冰雪姿。生來卽遣侍瑤池。五雲隔斷塵凡路。說着人間總不知。
上帝宸居儼肅森。九關虎豹立峯峯。羣龍自有三珠樹。不見扶桑水淺深。
東海鯨鯢白晝游。南溟風浪湧吞舟。三山亦在滄波裏。自是神仙未解愁。

黃鵠曲

黃鵠雙飛中路分。關山風雪隴頭雲。雲深雪暗知何處。哀叫聲聲天上聞。

吳歌五首

儂做春花正少年。郎做白日在青天。白日在天光在地。百花誰不願郎憐。
承郎顧盼感郎憐。準擬歡娛到百年。明月比心花比面。花容美滿月團圓。
便道逢春花合開。誰知穠豔有人猜。山鷄不入家鷄侶。野果難同園果栽。
蛾眉二八不會愁。有色無媒郎不留。月裏蟾蜍推落地。幾時再得廣寒遊。
栽花圖作看花人。誰料花開不及春。昨夜狂風今夜雨。爲花落得兩眉顰。

采蓮歌六首

十三女兒白似脂。向人學得做嬌癡。折得白蓮頭上插。苧羅山下賽西施。
十五女兒花正開。隨羣逐伴采花回。濃粧比似花嬌艷。引得黃蜂隊隊來。
采得紅蓮愛白蓮。雙橈快轉怕人先。爭知要緊翻成慢。菱葉中間絆卻船。

芍藥爭春銜彩霞。芙蓉秋盡卻榮華。有色有香兼有實。百花都不似蓮花。
女伴相隨出芰荷。並船比較采蓮多。擡頭忽見遊人過。權入菰蒲水拍波。
晚涼風定卻回船。望見新月在天邊。放下荷花深深拜。翻身忙整翠花鈿。

竹枝歌十二首

人間日月去如梭。快活無多辛苦多。欲識江南古來意。請君聽唱竹枝歌。
相思無益莫相思。贏得霜髯換黑髭。明月自圓還自缺。蚌胎瘦減有誰知。
陽臺雲雨漫荒唐。巫峽啼猿枉斷腸。莫向蒼梧山下去。九疑愁色滿瀟湘。
瀟湘江水接天河。第一傷心是汨羅。斑竹岡頭蘭蕙死。黃茅壠上艾蒿多。
榮華未必是榮華。園裏甜瓜生苦瓜。記得水邊枯楠樹。也曾發葉吐鮮花。
若要開花須護持。花枝怕雨怕風吹。抽條結蕊千辛苦。糝土埋苔一霎時。
彎彎月子似簾鉤。掛在梧桐樹上頭。月裏姮娥知何處。人間離別未爲愁。
昨夜星光照濕泥。五更依舊雨淒淒。懊惱人心難測度。說道東方卻在西。
杜鵑花開不着忙。石蓮花落卻恓惶。壚頭酒盡休懸望。裁衣無尺莫思量。
莫見乾藤道是香。莫見白石道是羊。布帘賣酒齊誇好。甜辣須還到口嘗。
鼉鼉在水虎在山。登山入水早防閑。別有一般真叵耐。蝦蟇生在月中間。
望帝無端化羽毛。無朝無暮口嘈嘈。見說天高三萬里。吻乾舌出也徒勞。

江南曲七首

江北垂楊未爆芽。江南水綠萬重花。北人盡道江南好。江南纔到便爲家。
金陵好是帝王州。城下秦淮水北流。惆悵江南舊花月。女兒盡作北歌謳。
洞庭湖色碧於藍。瀟湘日融花欲酣。黃雀樓中留醉客。懶人天氣是江南。
錢唐勝地作南都。紈綺如雲隘廣途。想得燕山風雪夜。斷魂相語怨西湖。
桃葉渡頭春水平。莫教城上曉鶯聲。中原無限英雄淚。併入江南送別情。
無情白日去如梭。有限青春可奈何。江北風沙人住少。江南秔稻鴈來多。
生長吳儂不記春。鄉音旋改踏京塵。丫頭小妓相偎坐。衆裏矜誇是北人。

前溪曲

前溪送別溪水滿。石楠花落蒲芽短。春風無情看復秋。莫學落花隨水流。

長門怨

不學周南詠小星。空悲玉殿鎖娉婷。黃金漫買相如賦。猶勝無辜送掖庭。

山鷓鴣六首

女兒未始會穿針。將去高麗學語音。教得新番鷓鴣曲。一聲准擬直千金。
鷓鴣能言百鳥驚。鷓鴣叫噪阻人行。珊瑚軟語呈嬌媚。不似班鳩得拙名。
溪深不比海子深。一物從來有一心。野鳧趕魚溪上去。鷓鴣飛過野鳧沉。

黃茅壟上雨和泥。苦竹岡頭日色低。自是行人行不得。莫教空恨鷓鴣啼。
鷓鴣元是嶺南音。嶺北無人識此禽。南人唱歌過嶺去。北人相向淚沾襟。
山禽一處一般聲。不是鄉音便動情。多是江南子規鳥。天津橋上對人鳴。

浣紗女二首

嫋嫋腰肢玉一圍。妬紅嬌綠淡春暉。莫教名字傳宮掖。終遣詩人刺綠衣。
臥薪終夜泣孤臣。落月飛霜幾度春。能使姑蘇聚麋鹿。誰知卻是浣紗人。

雙帶子四首

嫁時雙帶綉麒麟。翠葉金花色色新。寧教塵匣蒙蛛網。不肯將來別贈人。
結得同心欲寄郎。還將雙帶刺鴛鴦。殷勤祝付西歸燕。一紙書緘淚兩行。
合歡雙帶繡蜻蜒。一度看來一淚零。雪裏芭蕉心長在。春來不改舊時青。
莫言長夜便無明。莫道離鸞不合并。天上星辰能化石。黃河千歲也還清。

鷄鳴曲二首

霜飛月落天嶢嶢。啾啾喔喔鄰鷄鳴。龍蛇雜遝寰海沸。誰知此聲非惡聲。
莫厭晨鷄相應啼。中原千里絕晨雞。一匡自是無管仲。坐談不用誇曾西。

塞姑二首

苔沒行蹤草沒堤。滿簾紅日一鷺啼。天涯那得真消息。不敢逢人問磧西。

腸斷龍沙信不通。夢中長怕醒時空。夜來忽得榆關報。卻憶傳聞是夢中。滿篋衣裳手自裁。寄君親付與郎開。錦衾角枕期窈窕。遮莫無人莫寄回。

春曲二首

春天不雨亦不晴。楊花飄盡池萍生。庭鳥雛成巢燕暝。惟有杜鵑啼到明。春晴野煙生綠塘。春遊綵女鉛華光。碧雲日暮去何處。紅苕白蘋他自香。

楊柳枝詞九首

多事垂楊管送迎。長條折盡短條生。不知幾許東風裏。猶帶輕煙冒晚晴。薄將營中萬樹春。朱旗曉色動星辰。可憐煙雨章臺路。翠縷斜縈走馬塵。楊葉淒淒隱畫樓。楊枝嫋嫋弄輕柔。鳴鳩叫罷黃鸝語。肯信年華有素秋。憶昔春風白下亭。桃紅李白柳青青。繁華一夢今何在。露葉依稀似淚零。長干橋邊楊柳枝。千條萬縷鬱金絲。人來人去爭攀折。無復青青映酒旗。淮水春晴碧簾紋。楊花楊葉總成雲。錦帆零落美人畫。枝上流鶯誰獨聞。二月垂楊綠葉齊。無朝無暮子規啼。飛花袞袞向東去。卻被東風吹向西。枝上穠花吹漸稀。樓前楊柳正依依。春風解釋佳人恨。故卷繁陰放燕歸。長江春水去悠悠。亂絮輕花取次休。落日高樓怨橫笛。寒鴉飛盡暮蟬愁。

宮怨二首

沉沉煙雨掩孤闌。可怪東風到得遲。今日晴明上樓望。不知花謝已多時。何處春風拂苑牆。飛花片片入昭陽。多情尙有池邊柳。留得啼鶯伴日長。

女兒子

女兒二六月上弦。嬌羞長在阿婆邊。阿婆惜愛女兒子。女兒只愁阿婆死。

